


DIMIINU DYÀ NYÒKA

 Nzambi munanga, Nzambi munene ne wa bukole, Wâkenza bintu byônsò ku bukole bwa Nyuma Wende, ne wâkatwàla Yesu Kilisto, Mwânà Wende umwepele mulela, Wâkafwà patupu bwetu twètù bangènzàmpèkààtù, Mwakane bwa babi, bwa kutupungisha ne kutwaluja mu dyumvwangana dya dikema ditukaadi naadi cyakabidi ne Nzambi edi, bu mutudi bayiile mu Dìyì dibenesha ne, tuvwa Nende mu dyumvwangana kumpala kwa difùkà dya dyulu ne buloba: “Pavwa mitooto ya mu dinda yimba pamwe, ne bânà baa balume baa Nzambi beela mbila ya disanka, kumpala menemene kwa difùkà dya dyulu ne buloba.” Mmunyi mutudi bamanye ne kacivwa cikondo cimwecimwe aci cyakashipiibwa Mwânà wa mukooko; pavwa Nzambi, mu meeji Ende manene, mutumone twela mbila ne tusanka mu disungidiibwa dyetu mu Yesu?

² Nenu, diloolo edi, tudi bapete anu kaadyosha kaa butumbi bunene bwa Nzambi abu bwabuuludiibwa ku Dilwa Dyende dya cyakabidi. Masaama ne tunyinyanganya byônsò nebyumushiibwe. Pa dibà adi netwikale ne mubidi mufwanangane ne mubidi Wende Yèyè mwine wa butumbi, bwalu netuMumone bu mudiYe. Panwapa patudi tumona mudi byanza byetu byenda bifubidila, nsuki yetu yenda yandamuka mvyà, ne makaaya enda akobama, tudi tumanya ne tudi baa cifwaka ne tuya batangile ku lupwishi kudi mitu yetu miikale miinyika mpindyewu eku, kutudi bafumine. Kadi, Mukalenge Nzambi, anu mudibi bushuwa ne Wèwè udi Nzambi, Wèwè ke wâkenza mulayi wa ne netubiishiibwe cyakabidi ku lufu mu matuku a ndekeelu, nenu ke citudi twitabuujà.

³ Tudi biimane biimanyinemu ne diitabuujà dyetu diloolo edi mu Bwikadi Bwebe, biikale tulwa ne dikima bwalu Yesu wakatutumina dìyì bwa twètù kwenza nanku. Katuyi beeyemene cintu cîmpè kampana citudi benze to, bwalu katwena ne citudi benze cya cîmpè to; kadi tudi tulwa ne didipwekesha dyônsò, biikale tujikula ne tudi ne bubanji ebu bwa ngàsà Wende utudi bapete bu ne ke cyetu citupa. Ke bwa cinyi, tudi tulwa biikale tulomba bwa Wèwè kutubeneshà diloolo edi mu ditwala dya Dìyì. Bwalu mbifundiibwe, ne: “Muntu kaakwikala ne mwoyi ku dyâmpà nkaayadi to, kadi ku Dìyì dyônsò didi dipatuka mukana mwa Nzambi.” Nenu enzaku bwa mukana mwa Nzambi mwakule diloolo edi. Enzaku bwa mêyì apatuke, ne Dyôdi diye mu ndondo wa myoyi yetu, twètù bateeleji, ne yikale myûle tente ne Nyuma Webe ne Bwikadi Bwebe. Bwalu tudi tubilomba mu Dînà dya Yesu. Amen.

⁴ Lee—leelu ne makeelela, makeelela diloolo, eyowa’s we, ne leelu, tudi baakule pa cyena bwalu, dyambedi, citudi biinyike

dîna ne: *Bwà Cinyi Twètù Katwèna Dìngumba*. Ne tudi bambe bwalu abu ne bukole bwònsò, bwa cinyi katwena dingumba, ne bwa cinyi katwena twitabuuja mangumba. Bwalu, tudi tucisangana mu Bible ne, mangumba kâtu mateekiibwe kudi Nzambi to; atu mateekiibwe kudi dyabulu; ne twabijaadiki ne Bible. Ne mushindu udibi ne, kupicila ku mangumba, mbitwale ntupakanyi. Nenku tudi twamba maalu aa mbwa kulongolola ne kufikisha tabernacle ewu mu bwobumwe ku nyungulukilu wa Dìyì dibenesha dya Nzambi. Bwalu, bitudi tutekemena kî mbiibakila pa bidi dingumba dyamba, anyi bidi muntu kana yònsò ewu wamba to; mbiibakila pa bidi Mukalenge Nzambi mwambe. Nenku ke mushindu umwepele utudi mwa kulongodiibwa bîmpè.

⁵ Nenku mu dinda emu, mvwa ne maalu ataanu, ngela meeji, tunungu tushiileshiilangane tudi tupatukile mu dingumba, tudi mu bushuwa bwa bwalu katuyiku twamba mu Bible to, tudi ekeleeziya ya Mishòònyì itumikila, miikale itulongesha bu ne ke dilongesha dya nshindameenu: cintu cimwecimwe cidì maamu ndumba wa kale, ekeleeziya wa Katolike mwikale uyiisha aci, cipatuke e kubwela mu ekeleeziya wa Mishòònyì. Nenku nyewu tutumikila ku cintu cimwecimwe aci cidì ciikale cibengangana ne byònsò bidi myaba yònsò mu Bible.

⁶ Ekeleeziya wa cyena mangumba wa kumpala, tudi bakebulule mu mapingaja emu mu maalu malonda a baataatu baa Nicée, baa ekeleeziya wa Nicée. Ku lufu lwa bapostolo, ke kwakalwa baataatu baa Nicée, ke kutungunukabo bidimu mulongolongo. Bidimu nkama isatu ne makumi abidi ne bitaanu, ke ndekeelu wa byònsò kukafikabi ku—ku Nicée, France, kwakenzelabo nsangilu mu—munene wa Nicée. Nenku mwômò amu ke mwakafwimbilabo mēyì maswika aa adi naawu ekeleeziya wa Katolike mpindyewu, ne ke bidibo basambulujile beena Mishòònyì.

⁷ Nenku anu mûndì mwambe mu—mu dilongesha dya mu dinda emu ne: “Cyònsò cya ku bikondo bya ekeleeziya abi, too ne—ne ku cikondo cya ekeleeziya wa Tesalonika, bidimu cinunu ne nkama itaanu bya bikondo bya mîdimà, kakuvwa musangu nansha umwe uvwaYe kayi mwambe ne: ‘Ucidi ne Dîna Dyanyi’” to.

⁸ Nenku ku luseke lukwabo eku, kabacivwa kabidi mu Kilisto nansha, baakapatuka biikale ne dîna dya cyena mangumba ne: “Katolike, Luther, Wesley, Baptiste, Presbytérien, Mpenta,” too anu nanku.

⁹ Kadi anu kumpala menemene kwa ndekeelu wa cikondo aci, Yèyè kwamba ne: “Ndi muteeke kumpala kwebe ciibi cyunzulula.” Nwamonu anyi? Nenku ke cikondo citudi twela meeji ne ke citudi mpindyewu eci, cikondo cya ciibi cyunzulula,

pankaci paa dipatuka dya ndekeelu dya ekeleeziya wa Laodikiya.

¹⁰ Nenuk bidi anu menemene bidimu nkama isatu ne makumi abidi ne bitaanu too ne ku nsangilu wa Laodikiya. Nenuk mwômò amu ke mwakiitababo bintu bya kwîsùkwîsù ebi bu mudi dimyaminangana dya mâyi, dipongolwelangana dya mâyi, ne mabatiiza a mashimi, nyuma mwîmpè wa mashimi, bintu bikwabo byònsò ebi. Bòbò kubiitaba.

¹¹ Nenuk pashiishe Luther, mwikale nsaserdose, paakatukaye mu ekeleeziya wa Katolike, wawalwa ne bintu ebi pamwe ne cyôci aci. Ke kupatukamu Zwingli, mu Zwingli kupatukamu Calvin, mu Calvin kupatukamu Wesley, kaa, anu nanku. Nenuk badi anu batungunuke ne kusambulujilangana twitabaayi ayi. Nenuk mmunyi mudi Nzambi mwa kulombola Ekeleeziya Wende, padibo benda balonda njila ituYe kayiku mwanji kufila bwa bòbò kulombodiibwamu?

¹² Nenuk nwavulukaayi ne, mu Bwakabuulwibwa 17, tudi tusangana “mukaji.” Mpindyewu mêyi aa mmatooke tòò. Mmafunda mu Bible, pa nanku ndi ngela meeji ne ndi mwa kuamba. Mbambe ne mukaji ewu uvwa “ndumba.” Mbwena kwamba ne uvwa mmukaji wa luumu lubi; bwa ne uvwa ne cya kwikala musediibwe kudi mulume, kadi mwende masandi ne baa pa buloba. Nenuk uvwa ne...Uvwa “MAMWÈNDÈ WA BANDUMBÀ,” nanku uvwa ne bânà baa bakaji. Nenuk tudi bazole cintu aci bilondeshilangane ne maalu a buloba, mwikale mu...Nenuk mwômò amu, mêmè mwine, mmona mu Mifundu, mmona malongesha ende ne bikwabo byònsò, ndi ngitabuuja ne Mukalenge mmuciteeke anu mu njila waci menemene, mu mushindu wa ne kaciyena mwa kwikala cîngà cintu to anu ekeleeziya wa Katolike. Ke mushindu umwepele udici mwa kwikala. Nenuk yêyè awu mmulele cinyi? Ekeleeziya ya Mishòonyi. Menemene, yêyè ke udi muyilele.

¹³ Nenuk uvwa mu cyanza cyende ne dikopo dya mvinyo wa masandi ende, mwikale umupa bamfumu baa pa buloba. Ne yêyè ke uvwa mukookeshi pa buloba bujima, mu ngaakwilu wa mu nyuma. Nenuk aci ncya bushuwa menemene. Kakwena mukwabo... .

¹⁴ Tangilaayi, twètù, tudi bafwanyine kwalukila mu Danyeke bwa kwangata cimfwanyi aci. Tangilaayi cimfwanyi aci: mutù wa ngòlò, bukalenge bwa Baabulona; cyamu cya kabanda... anyi cya argent, Meedaayi ne Peelesa; cyamu cya kabanda, Alexandre le Grand, ne bikwabo, bukalenge bwa Gelika; pashiishe makalenge maalabale a beena Loomo, Loomo wa ku Esete ne wa ku Wesete, makàsà abidi awu.

¹⁵ Nenuk monaayi mu makalenge dikumi aa, adi alwa menemene ne nsengu dikumi ituvwa twamba mu dinda edi ayi, mu bwònsò bwa ku makalenge dikumi àvwà ne cya kujuuka awu,

muvwa cyamu cifiike ne diima bisambakaja. Ne cyamu cifiike aci civwa cifumina ku mikolo, civwa ciikale Loomo. Nenku kudi kashoonyi kaa cyena Loomo kiikale kasambakaja mu ditunga ne ditunga dyônsò didi mwinshi mwa Dyulu, kupicila ku ekeleeziya wa Katolike. Ncya bushuwa menemene. Nenku kî mbifwanyine kusambakana to, nansha mwaba kaayi.

¹⁶ Nenku bavwa mwa kwenza dibaka disopakaja, ewu ne ewu. Bible ngudi mwambe ne nebênzè nanku. Nenku batangilaayi leelu ewu. Mwaneebe wa balume upatuka ne mwânà wa bakaji mwena Katolike; padibo baya bwa kuselangana, bikengela balayangane bwa kukoleshabo bânà baabo abu biikale beena Katolike; nwamonu's, eci anyi eci. Nwamonu's, mbwa kucibula bukole bwa mukwabo.

¹⁷ Kadi ncinyi ciine aci? Bible udi wamba ne cintu cyônsò mu kaabujima nndumba. Mpindyewu cinwenza ncinyi? Ncya bushuwa. Nenku mushindu wikala mpekaatu ya bantu ne cya kunyookiibwa. . . Tuvwa baalukile mu Dutelonoma, twêtù kuleeja ne mwânà mulela mu masandi, mwânà wa panshi, kavwaku nansha mwa kubwela mu disangisha dya Mukalenge to munda mwa nkongo dikumi ne inaayi. Aci civwa mmu mikenji ya Môsà. Ke Kilisto kulwa kukolesha mikenji ayi. Mbikolesha kabidi kupita apu mushindu kaayi mpindyewu ewu?

¹⁸ Nenku ncinyi cidi cyenzekela aba nenku, mbwalu kaayi ne tukaji twa mvwadilu mibi twa mu mùsèèsù etu leelu wa Ndaaya ewu, tukaji tunù twa mfwanka etu, ne tuvwadi twa tuputulu, tukaji twa mvwadilu mubi twa nsuki mibebula etu, ne bikwabo? Neilumbu kaayi eci ne cyôcì aci? Mbwalu mamwâbò uvwa wenza nanku. Ndinyooka, bubi, busambulujà ku lukongo ne ku lukwabo. Ke mudi bwalu nanku. Kadi citudi bapete ncinyi? Tukaadi bafike pa mwaba wa ne, cikaadi kaciciyi cingà cintu to anu mushiki wa mpekaatu ya bukooya myambakaja.

¹⁹ Ke bwa cinyi Nzambi mmujuule Russie, kwaka naka, ne bombe wa mushinda bwa kumukupula kashidi, anu muvwa mvula wa Noa, paakajuulaYe mavuba. Ncya bushuwa, ncidiYe mwenze. Ne Bible udi wamba nanku. Russie, ditunga dya badi babenga kwitaba diikalaku dya Nzambi adi, babenga kwitaba diikalaku dya Nzambi, kakuyi mpatà to mmwenze mudimu wende anu menemene mu byanza bya Nzambi wa Bukole bwônsò. Anu mwakadibi ne Mfumu Nebukandeneesa uvwa ne cya kubutula Izaleela bwalu baakapanga kwenda ne Nzambi, Russie udi munkaci mwa dijuuka bwa “kusombwela bansantu,” kudi ekeleeziya wa Katolike, bwa mashi a bansantu akeelaye panshi. Ke cidi Bible mwambe. Yèyè neangate cintu cyônsò nkòong.

²⁰ Nenku tangilaayi kuneeku, piikalabi ne mamwâbò uvwa muji wa maja, ne kawâbò mukaji, ne mamwëndè mwikale mukaji wa mvwadilu mubi, yèyè udi cinyi leelu ewu? Muji wa

maja a rock'n'roll uvuula ne bilàmbà. Bende bânà nebiikale cinyi?

Nenku wêwè udi wamba ne: “Nzambi udi wenza nanku anyi?” Eyowa’s, mukalenge.

²¹ Nzambi udi unyooka bubi bwa bânà, lukongo, too ne ku nkongo dikumi ne inaayi. Piikala Kilisto mulwe kucikolesha, twètù’s tudi bafwanyine kwamba ne: “Nkongo lukama, anyi nkongo nkama itaanu.” Mona’s, Yêyè mmwambe ne: “Baa kale abu, nutu bumvwe baakamba, bôbò baa kalekale abu ne: ‘Kushipyanganyi.’ Mémè ndi ngamba ne: ‘Wêwè, muntu yêyè anu mufiikile mwanaabo munda, kakuyi bwalu to, wamanyi kushipangana.’ Nutu bumvwe bamba, bôbò baa kalekale abu ne: ‘Kwendi masandi.’ Kadi Mémè ndi ngamba ne muntu yêyè mutangile mukaji bwa kumwalakana, wamanyi kwenda masandi.” Yêyè wakacivwija... *Kukolesha* mbwena kwamba cinyi? Kucivwija cinene misangu yâbûngi. Nenku piikalabi ne mu mikenji ya Môsà civwa nkongo dikumi, cintu cimwecimwe aci necyangate cikondo bule kaayi leelu wa Ndaaya ewu?

²² Nenku nsongalume, ne bantu balume baa bashindame, ne balume bakaadi baselangane kabeena ne kaneemu kâàbûngi bwa micipu yabo ya dibaka to. Mona’s, badi bangata anu bakaji benda naabo masandi myaba yônsò cyanaana, anu mudi mbwa yônsò cyanaana eyi. Mbwa udi ne kaneemu kîmpè ne nsòmbelu mwîmpè kupita bamwe bantu. Cibì ndi mumanye ne aci ncikole cipange ne mwa kukola, kadi ncyà bushuwa.

²³ Bwa cinyi? Ne ekeleeziya miine paayi idi yenda iya anu kumpala kayiyi yamba bwalu nansha bumwe pa cyôci aci to. Bwa cinyi? Idi yenza maalu anu mudi mamwâbò wenza. Ekeleeziya idi yipyana cyôci aci. Bwalu, ekeleeziya ne ekeleeziya wa Mishònyì ewu mmupatukile mu ekeleeziya wa Katolike, mpekaatu ya ekeleeziya wa Katolike badi bayinyookela pa beena Mishònyì. Ncyà bushuwa, ke mudibi, ke bwalu kaayi lwesu lwa mishila kalwena mwa kwamba mbidika wa diipikila café ne “mmufiike” nansha. Mbulelela anu bwa menemene ebù.

²⁴ Mpindyewu tudi tujandula, kabidi mu Mifundu, tudi tujandula... Ne mêmè mwine ncyêna mumoneku kabeji pa mesa apa diloolo edi to. Ngâmbì ne: “Ndeejaayi kaaba kamwe cyanaana kakaadiku Nzambi muteeke dingumba. Ndeejaayi kaaba kamwe cyanaana kakaadiku Nzambi muteeke muyiishi mukaji. Ndeejaayi kaaba kamwe cyanaana kakaadiku Nzambi muteeke dimyaminangana dya mâyi pa mutù. Ndeejaayi kaaba kamwe cyanaana kakaadiku Nzambi muteeke dipongolwelangana dya mâyi pa mutù. Ndeejaayi kaaba kamwe cyanaana kakaadiku Nzambi muteeke ne muntu ukaadi mubatiijiibwe mu dîná dya ‘Taatu, Mwânà, Nyuma Mwîmpè.’ Mpetelaayi bintu abi.” Nansha nanku tudi anu tubyenza ku

musangu ne ku musangu. Bidi anu munda mwa ekeleeziya bituule bipuwe.

25 Mpindyewu, ngâmbi ne: “Bilondeshile wenu mushindu wa kabingila kadi kenza ne katwena mwa kwikala ba-Baptistes, mbwalu tudi twitabuuja ne bikengela bantu babatijiibwe mu Dîna dya Mukalenge Yesu Kilisto. Kakutu nansha umwe kacya, mu Bible, ukaadiku mubatiijiibwe mûngà mushindu to. Ndeajaayi kaaba kamwe cyanaana kakaadiku muntu nansha umwe mubatiijiibwe mu dîna dya ‘Taatu, Mwânà, Nyuma Mwîmpè,’ nêngèlè byanza byanyi muulu ngâmbè ne ndi muprofeta wa mashimi.”

26 “Kadi piikala Bible wamba ne nudi ne cya ‘kubatiijiibwa mu Dîna dya Yesu Kilisto,’ mbwena kwamba ne nudi ne cya kucyenza mushindu awu. Pòlò wakabatumina dîyi bwa bôbò kubatiijiibwa cyakabidi. Nansha mukaavwabo bamane kubatiijiibwa amu, bivwa bikengela kulwabo, kubatiijiibwabo cyakabidi. Bakaavwa bamane kubatiijiibwa kudi muntu mwine umweumwe wa bwena wâkabâtiiza Yesu Kilisto awu; Yone Mubatiiji. Yêyè kwamba ne: ‘Aci kacyakukumbana kabidi to. Bikengela nulwe, nubatiijiibwe cyakabidi.’ Ne bivwa bikengela bôbò kucyenza kumpala kwa kupetabo Nyuma Mwîmpè. Ke civwa ndongamu wa Nzambi.”

27 Ndi mufwanyine kuya anu ndambu mu ndondo kupita apu, diloolo edi. Bwa cinyi? Yesu utu ushaala mukwate ku Dîyi Dyende. Nudi nwtitabuuja aci anyi? Mpindyewu, ciibwîpî ne nwênù bônsò nuvwa apa mu dinda emu, kadi ndi muswe kusuminyinapu ndambu kupita apu.

28 Mbwa cinyi buvwa Pòlò mwa kutum-...kutuma dîyi paanyima paa cyôci aci cimana kwenza? Pòlò wakamba ne: “Nansha mwanjelo mufume mu Dyulu mulwe kuyiisha nî ncinyi nî ncinyi cikwabo, ediibwe mulawu.”

29 Mpindyewu nudi nwamba ne: “Tukaadi ne Bukênkè bupyabupya pa bwalu abu.” To, kanwena naabu to. Aci ncivwa dyabulu mulwe naaci kudi Eva, Bukênkè bupyabupya kampanda. Kabyena binukengela Bukênkè bupyabupya to. Bidi binukengela kwendela mu Bukênkè budi Nzambi mumane kuteeka apa, kwajiki.

30 Mpindyewu tangilaayi eci, mushindu udici cipepele. Pavwabo benda batuuluka ku Mukuna wa Dishintuluka dya mpala, Yesu wakamba, wambila bayiidi Bende ne: “Bantu badi bamba ne Mêmè Mwânà wa muntu ewu ndi nganyi?”

“Bamwe mbambe ne Wêwè udi ‘Môsà, anyi Eliya, anyi umwe wa ku baprofeta.”

Yêyè ne: “Nwênù nudi nwamba ne nganyi?”

31 Yêyè kwamba, Peetelo kwambaye ne: “Wêwè udi Kilisto, Mwânà wa Nzambi udi ne mwoyi.”

32 Yèyè ne: “Udi mubeneshiibwe, Simona, mwànà wa Yona; bwalu kî mmusunya ne mashi bidi bikubuulwile eci to.” Nwamonu’s, kacyena cifumina ku ma-seminere to. Kacyena cifumina ku mangumba to. “Kî mmusunya ne mashi bidi bikubuulwile eci to. Kutu mucilongele mu kalaasa kampanda kaa maalu a Nzambi to. Kadi Taatu Wanyi, udi mu Dyulu awu, ngudi mukubuulwileci. Nenku pa lubwebwe elu ke pângìbakilà Ekeleeziya Wanyi; ne biibi bya ku iferno kabyena mwa kumupita bukole to,” dibuulula dya mu nyuma dya ne Yèyè udi Nganyi.

33 Monaayi: “Nenku Mémè ndi ngamba ne wèwè udi Peetelo. Ne Mémè nènkupè nsapi ya Bukalenge. Nenku cyònsò ciwaswika pa buloba, Mémè nènciswikè mu Dyulu; cyònsò ciwasuulula pa buloba, Mémè nèncisùulùlè mu Dyulu.” Mpindyewu, bivwa bikengela Yèyè kushaala mulamate ku Dìyì Dyende cyanaana Yèyè kavwa Nzambi to. Mpindyewu, paakenzaYe cyòci aci, paanyima paa ndambu wa matuku, Yèyè wakapoopediibwa pa nkuruse, wakabiika ku lufu, wakabanda mu Dyulu, nenku Peetelo kukangula Evanjeeliyo mu Dituku dya Mpenta. Yèyè ngwákacyèza anyi? Nyèyè, cya bushuwa, yèyè ngwákacyèza. Mpindyewu tangilaayi, pavwaye mwa . . .

34 Bònsò bavwa babaseka, bwalu bavwa buujiibwe ne Nyuma. Baakababiikila ne “baabuludyanganyi, bansantu babunguluki baa mu malaba,” anyi dînà kampanda dya mushindu awu. Ne bòbò biine baakaseka, bamba ne: “Mbûle ne mvinyo mupyamupya.”

35 Ke Peetelo mwimane munkaci mwabo, kubandisha dîyì, kwamba ne: “Balumyana ne bânà beetu, teejejaayi dîyì dyanyi. Teejejaayi mèyì aanyi mémè ne ngumvwayi. Bantu aba kî mbakwacike munudi nucinka ne mbakwacike amu to; tucidi anu pa dîbà diisâtù dya dituku. Kadi eci ncyakambabo kudi muprofeta Yowela ne: ‘Nebyenzeke ku matuku a ndekeelu ne, Mémè nèmpongololè ndambu wa Nyuma Wanyi,’ civwaYe mwa kwenza pa bânà Bende baa balume, ne bânà Bende baa bakaji, ne beena mudimu Bende bakaji, ne bikwabo, mu dituku edi.”

36 Nenku paakabangabo kuteeleja eci, baakalengiibwa mu myoyi yabo. Bwalu, baakumvwa muntu uvwa kayi mumanye nansha ABC wende to, kadi byakakengela bwa bamupe maci, bamanye ne uvwa ne Cintu kampanda munda mwende, ciikale cilakuka kapya mu yèyè, Nyuma Mwîmpè. Ke kumwimanyika anyi’s? Mona’s, aci civwa cifwanyine kwikala bu kuteeta kujima kapya, pa nzubu mûme, dituku dya lupeepele lukole lutuuta. Kamuvwa mushindu wa kucyenza to. Yèyè uvwa mûle tente ne Nyuma Mwîmpè. Kadi cyakenzaye ncinyi mpindyewu?

37 Baakamba ne: “Ee, balumyana ne bânà beetu, netwènzè cinyi bwa kusungidiibwa?”

38 Mpindyewu wadimuka, Peetelo, wèwè ngudi ne nsapi ya Bukalenge. Nwamonu anyi?

³⁹ Mpindyewu, paakabiika Yesu ku lufu mu dituku diisâtù, Yêyè kavwa ne nsapi ya Bukalenge bwa mu Dyulu to. Nuvwa bamanye aci anyi? Wakamba ne: “Ndi ne nsapi ya lufu ne ya iferno,” pa kuumusha ya Bukalenge, bwalu ikaavwa mimana kupa Peetelo.

⁴⁰ Mpindyewu Yêyè wakamba ne: “Peetelo, cyônsò ciwasuulula pa buloba, Mêmè nêncisùùlùlè mu Dyulu. Ciwaswika pa buloba, Mêmè nênciswikè mu Dyulu.”

⁴¹ Mpindyewu ke yêyè ewu mwimane ne nsapi ayi, bwa yêyè kukangwila baa pa buloba cintu cibenesha eci. Nenku’s nyêyè ewu ne nsapi ayi mu cyanza cyende. Nenku bôbò badi bakonka ne: “Tudi mwa kwenza cinyi bwa kusungidiibwa?” Mpindyewu, mupostolo nansha bu yêyè mwambe nî ncinyi nî ncinyi cyônsò cya kwenza, budi Nzambi naabu nkucitaba mu Dyulu, piikalabi ne Yêyè guvwa mumupe bukookeshi abu.

⁴² Mpindyewu ke Peetelo ne: “Nyingalalaayi, muntu ne muntu wa kunudi, nubatiijiibwe mu Dîna dya Yesu Kilisto bwa dilekelediibwa dya mpekaatu yenu, nenku nenupete kupà kwa Nyuma Mwîmpè.” Ncya bushuwa anyi? Nenku ke bwalu kaayi nsapi ayi yakanyunguluka mu Dyulu bwa dîna dikwabo dyônsò, mu mushindu mukwabo wônsò, mu luseke lukwabo—luseke lukwabo lwônsò. Yakanyunguluka pa buloba, ne yakanyunguluka mu Dyulu, cyanaana Yesu katu mashaale mulamate ku Dîyì Dyende bwa Peetelo to. Ne mwaba wônsò mu Bible wakabatijiiwbabo, paanyima paa aci, baakabatijiiibwa mu Dîna dya Yesu Kilisto. Ne aba baakabatijiiibwa kumpala kwa aci, byakakengela bwa kulwabo kubatiijiibwa cyakabidi, mu Dîna dya Yesu Kilisto, bwa kupetabo Nyuma Mwîmpè. Aci ke cidì cijaalame. Bidi byenda biya anu mu mushindu umweumwe awu.

⁴³ Pa nanku, patwikala tulongesha dibatiiza mu dîna dya “Taatu, Mwânà, ne Nyuma Mwîmpè,” aci nciprofeta cya mashimi. Mpindyewu ncyèna muswe kunutpa ku mwoyi to, kadi bidi bikengela mpoopele bwalu ebu bwa ekeleeziya ewu amanye ne ke mudici amu. Katwena mwaba ewu bu musumba wa bakoleshi baa maalu kabayi balonge nansha; tudi bamanye mwaba utudi biimanyine mu Dîyì dya Nzambi. Nwamonu’s, tudi bamanye. Mêmè ndi ngela muntu yônsò kadyombo bwa kundeejaye kaaba nansha kamwe kadi muntu nansha umwe ukaadiku mubatiijiibwe mu dîna dya “Taatu, Mwânà, Nyuma Mwîmpè.” Mpindyewu cinwateeleja ke ciprofeta cya mashimi anyi ke Bulelela? Kenketaayi Mifundu. Abu budi anu mbwenu.

⁴⁴ Ndeejaaayi muntu umwe cyanaana mu Bible, mwaba ukaadiku ekeleeziya muteekiibwe bu dingumba mu—mu Bible. Nundeeje mu Bible mwaba ukaadibo bateekeku muyiishi mukaji. Nundeeje mu Bible mwaba udi bintu byônsò ebi,

bitwambì ebi, ukaadibi biteekiibweku mu Bible. Kabyenam u to. Nundeeje mwaba umwe cyanaana. Ndaayi ku dingumba . . .

45 Ee, paakajuuka ba-Méthodistes, baakayiisha dijidiibwa. Aci mbîmpè. Kadi, paakenzabo ciine aci, baakenza dingumba, nanku ke bwabo bumba bujika's. Ke bwa cinyi Bible mmwambe ne: "Nudi ne dînà."

Wêwè udi wamba ne: "Mêmè ndi mwena Kilisto."

"Ee, udi mwena dingumba kaayi?"

46 Udi wamba ne: "Méthodiste," mona's, aapu's udi ndumba. "Ndi Baptiste," ndumba. "Mwena Mpenta," udi ndumba. Udi muntu wa ekeleeziya kampanda.

47 Bivwa bikengela wêwè kwikala muntu wa Kilisto. Kwêna ne bwalu bwa kwamba ne: "Méthodiste," "Baptiste" to. Wêwè mwikale mwena Kilisto, udi mwena Kilisto mu mwoyi.

48 Dyônsò dya ku mangumba awu didi mwa kupatula bâna, bâna baa Nzambi, ncyá bushuwa. Kadi paudi wela meeji ne neuye mu Dyulu anu bwalu udi Méthodiste anyi Baptiste, udi mu ntupakanyi. Nenku ke bwa cinyi twêtù tudi pambelu paa cintu aci.

Ba-Baptistes kabeenaku mwa kumona bwa cinyi?

49 Mwva mukonke muntu mukwabo Méthodiste mwaba ewu, mwikale ufunda mukanda wa cibungu, wakafundabo kukaadi ntanta. Yêyè ne: "Cintu cimwepele citudi twêtù tukubengela wêwè, udi mulamakane ne beena Mpenta."

Mêmè ne: "'Twêtù' ke banganyi?"

"Twêtù, ba-Méthodistes."

50 Mêmè ne: "Ee, nênkwambilè cîngènà. Nêndwe mu cimenga cyenu amu kadi nushiile ba-Méthodistes batuule mfranga bwa cyôci aci."

"Kaa," ke yêyè awu, "mu bushuwa bwa bwalu, twêtù katwena bafwanyine kwenza aci to."

51 Mêmè ne: "Ke cîmvwà mudyâmbidile menemene. Ndi nshaala ne beena Mpenta bwalu beena Mpenta mbadi baciitabuuja. Ncyá bushuwa. Bôbò badi badyungwija bacinyungulukile. Bôbò mbadi bapeta bipeta bîmpè bya ku cyôci aci."

52 Mbanganyi bavwa babale kanungu aku mu cikandakanda cya *Life*, anu matuku abidi adi panshi aa, pa bidi bitangila ekeleeziya wa beena Mpenta? Ke cimwe cya ku bintu bidi bikemesha bidi bitambe bunene mu cikondo eci. Mbapete bantu bàâbûngî badi bakudimune mucima mu cidimu cimwe kupita ekeleeziya mikwabo yônsò misanga. Bwa cinyi? Nansha mu bilema byabo biine abi, Nzambi udi anu ubatuma kumpala, bwalu badi biitabuuja Bulelela ne benda naaBu. M'Bulelela.

53 Kadi citudi twenza ncinyi mpindyewu? Nwamonu anyi? Ke cidi cyenza ne twètù katwikadi dingumba to. Nenku anu mudi bushuwa beena Mpenta badyènzè dingumba . . .

54 Nenku kalekale wawa, paakapongoloka Nyuma Mwîmpè musangu wa kumpala pa ekeleeziya wa beena Mpenta, kukaadi bidimu makumi anaayi, bôbò kubanga kwakula mu myakulu, dimwe dya ku mapà. Ke didi ditambe bukesa ku mapà. Ke didi dishaadile ku mapà, bilondeshile Pòlò Munsantu, ndyakula dya mu myakulu. Nenku ndyenze anu dipona: “Kaa,” ke bôbò abu, “twâMupeci mpindyewu,” ke kwenzabo dingumba, Nsangilu wa Bantu bônsò, udi leelu Assemblées de Dieu ewu. “Kaa, muntu nansha umwe kêna muMupete to paudi kuyi wakula mu myakulu,” ke Nzambi kumba kutapuluka naabo, kubashiya basômbe mwaba awu. Ncya bushuwa. Eyowa’s, mukalenge.

55 Pashiishe kulwaku ba-Unitaires, ke bôbò kujandula dibatiiza dya mu Dîna dya Yesu. Bôbò ne: “Kaa, twâMupeci,” bôbò kudyenza bulongolodi. Civwabo mwa kwenza ncinyi? Nzambi kumba kupatuka e kubashiya basômbe mwaba awu.

Cilumbu ncya ne: “Ewu yônsò udi muswe, alwe.”

56 Nwamonu’s, ba-Unitaires kabeena mwa kuya kudi beena Assemblées to. Beena Assemblées kabeena mwa kuya kudi ba-Unitaires to. Mvwa muyiikilangane ne bamwe baa ku bantu baa batambe bwîmpè badibo naabo, Mukalenge Goss, ne Docteur Pope, ne bààbûngi. Bantu badi bantu baa banene mu . . . Mêmè kusômba naabo. Mêmè ne: “Mmunyi mûdi mwa kuyiisha aci bu cileeji cya ntwadijilu, wêwè mumanyi mujima wa dibâla?”

57 “Ee,” ke yêyè awu, “Mwaneetu Branham,” umwe, babidi anyi basatu baabo, bavwa menemene baa kweyemena, bôbòne, “tudi bamanye ne aci ncya cyanaana, kadi citudi mwa kwenza ncinyi? Twètù badidinge bambe cintu cibengangane ne cyôci aci mpindyewu, mona’s, necinyangakaje ndongamu yônsò.” Bushuwa, ne wêwè mwine kwakwikala kabidi mwepiskopo to, anyi mutangidi munene. Ke mmwenenu nyawu.

58 Mwaneetu, s’mbipiciibwe ne mêmè mwikale ne kaacitanda kakese mu disangu, anyi kuyiishila mwinsi mwa mucu wa pin, cibî mwikale ne Bulelela, ncya bushuwa, kadi mwikale mumanye ne udi wamba Bulelela. Muntu cidiye ukeba m’Bulelela. Nenku wêwè udi mwenzajibwe, wêwè bu mwena Kilisto, bwa kufidila Bulelela bujaadiki. Nzambi neakwomekele bujitu bwa cyôci aci.

59 Pashiishe, mu maaluu aa, pawikala kuyi mubatiijibwe mu Dîna dya Yesu Kilisto to, ne kuyi mwenze bintu ebi to, ne kuyi mupete Nyuma Mwîmpè . . .

60 Udi wamba ne: “Kaa, mêmè’s ntu mwakule mu myakulu.” Aci kaciyena ciswa kwamba ne udi mupete Nyuma Mwîmpè to.

61 Mêmè nkaadi mumone baloji bakaji, baloji balume, badémóns, ne bikwabo byônsò, baakula mu myakulu. Cya

bushuwa. Kabatu bapete Nyuma Mwîmpè to, nudi bamanye nanku. Banwina mashi mu tubalubalu twa mitu ya bantu, baja maja, basoka dyabulu, biikale baakula mu myakulu. Cya bushuwa. Kabatu bapete Nyuma Mwîmpè to.

⁶² Nenu, bwalu utu mwakule mu myakulu, aci kaciyena ciswa kwamba ne udi muMupete to. Mushindu umwepele ûdi mwa kumanya ne udi muMupete, mpadi nyuma webe ufidila Nyuma Wende bujaadiki, ne mamuma a Nyuma miikale akushindikija: dinanga, diitabuuya, disanka, ditalala, mwoyi mule, bwîmpè, bupole, kalolo. Ke paudi umanya ne udi mupete Nyuma Mwîmpè. Yèyè ngudi uDifidila bujaadiki.

⁶³ Mpindyewu, paudi uteeta kushindameena pa ne, bwalu udi mwena Assemblées, anyi Baptiste, anyi Presbytérien, udi umona cyûdi wenza aci anyi? Udi wangata dîna dya ndumba. Ncya bushuwa menemene. Patuka mu cintu aci. Nda kule naaci. Ncyèna nswa kwamba ne nkupatuka mu ekeleeziya webe anyi cintu kampanda to; wèwè enza anu cyûdi muswe kwenza pa bwalu abu. Kadi umuka ku dyeyemena pa ne: “Kaa, mêmè’s ndi Presbytérien. Katutu twitabuuya bya matuku a bishima abi to.” Kanwena nuciitabuuya bwa cinyi? Bible’s ngudi ucilongesha. “Kaa, mêmè ndi mwena Église de Christ. Batu bamba ne matuku a bishima akaadi mamane kupita.” Abu mbapofeta baa mashimi.

⁶⁴ Mêmè ndi mwa kukuleeja mwaba wakafila Yesu Kilisto Bukole kudi Ekeleeziya, bwa kwondopa babeedi, ne kubiisha bafwe, ne kwipata badémons. Ndi ngela nî nganyi nî nganyi kadyombo bwa kundeejaye Mufundu mu Bible mudiYe mubûmûshe mu Ekeleeziya. Cidi cibûmûshe ncinyi? Mèyi enu anudi badiswikile awu, mmwômò, kî n’Dîyi dya Nzambi to. Nyuma Mwîmpè ucidi anu wenzeja mudimu awu, mwikale utungunuka anu mushindu umweumwe awu, ne Yèyè neatungunuke kashidi.

⁶⁵ Ke cidi cyenza ne twètù katwikadi dingumba to: “Biikale ne cimwenekelu cya difwana dya Nzambi, kadi biikale babenga kwitaba Bukole bwadi; kudi baa nanku awu umuka.” Katwena twitabuuya mu bintakanyi bya nanku awu abi to.

⁶⁶ Mpindyewu, cyakabanga mene bishi? Bikengela tulwijakaje bwa kufika ku cyòci aci ne lukasa lwônso mpindyewu, mushindu mene wakabangaci. Mpindyewu tudi ne Mifundu bûngi cyanaana mifunda apa pa bidi bitangila Nyuma Mwîmpè.

⁶⁷ Nenu cikwabo cintu, tuvwa beele kadyombo makeelala diloolo, pa “dinanukila dya bansantu,” kacyi mu mushindu udi ba-Baptistes baciitabuuya awu to. To, mukalenge. Mêmè ndi nshilangana ne ba-Baptistes ne wabo mmwenenu awu, pa dilongesha dyabo dikwatakaja dya Calvinisme adi. Ndi mbengangana cya bushuwa ne ba-Presbytériens. Ndi mbengangana ne ba-Méthodistes pa dilongesha dyabo dya

Arminianisme. Eyowa's, mukalenge. Kadi bubidi bwabo badi bônso ne bulelela kampanda, kadi bikengela walukile paanyima *Apa* padici ciikale Bulelela. Paudi unyeema lubilu upatuka pambelu paapa, udi upeta naaci mukupa. Mbushuwa.

⁶⁸ Ba-Baptistes badi babwela, babatiiza bantu babidi apa, mu diinyija dya mu mâyi; nenku muyiishi ubabatiiza, bantu citeema pa dikumi biikale banwa mfwanka, baalukila bapatuka bakiimana pambelu paapa, banaya twarta, banaya bunko bufuku bujima, banyeemakana eku ne eku, ne benza bintu bikonyangale mu mishinga; ne bakaji bônso bavwala tuputulu pambelu apa, banyeemakana eku ne eku mu misèesù, babebula nsuki yabo, biikale—biikale banwa mfwanka ne balabakana, benza tuumafesto twa ditela ne diluka mipilu, benza mineku ya bundu. Nudi nubiiikala ciine aci ne mbwena Kilisto? Kadi kudyambidila peenu munudi ne dikubiibwa dya Cyendeleele? Nwênù's nuyaaya mu iferno mu mushindu awu. Kanwenaku bafwanyine kusankila mu Dyulu to nansha bya munyi. Nansha kakese. Aci kî ndikubiibwa dya Cyendeleele to.

Kadi padi muntu mulediibwe cyakabidi ku Nyuma Mwîmpè. . .

⁶⁹ Ne wêwè mwena Mpenta, anu bwalu udi mutupike muulu ne panshi, mwakule mu myakulu, munyeemakane mutwe eku mutwe eku kwa kajila, aci kacyna ciswa kwamba ne udi ne dikubiibwa dya Cyendeleele nansha. Kwikadi waditeekelaku aci mu mutu webe awu to. To, mukalenge. Kacyna ciswaku kwamba nanku to. Bwalu, udi mumanye ne nsòmbelu webe yèyè mwine—webe yèyè mwine udi ufila, bujaadiki, ne kwêna mukumbanangane kumpala kwa Nzambi to. Ncya bushuwa. Kwêna mukumbanangane to. Aci kî ndikubiibwa dya Cyendeleele to, nansha nanku.

⁷⁰ Kadi nyawu njinga kunukonka cintu kampanda. Kutu dikubiibwa kampanda dya Cyendeleele anyi? Bible udi wamba ne didiku. Bible mmwambe ne mènà etu akafundiibwa mu Mukanda wa Mwoyi wa Mwânà wa mukooko kumpala mene kwa dyulu ne buloba kubangabi.

⁷¹ Anu bu mûmvwà ngamba mu dinda emu, ndi ncyambulula. Muntu wâkafùnda musambu wa ne: “Nkufundiibwe dîna dipiyadipya mu Butumbi diloolo edi, diine adi ndyanyi mêmè,” mmwenenu wende uvwa wa bushuwa, kadi yèyè uvwa mutupakane, bilondeshile Mifundu. Dîna dyebe kî ndifundiibwe diloolo dyûdî musungidiibwe adi to.

⁷² Dîna dyebe, bilondeshile Bible, bilondeshile Bwakabuulwibwa 13.17, ne bikwabo, “dyakafundiibwamu kumpala mene kwa dyulu ne buloba kubangabi; ne Yesu Kilisto wakashiibwa kumpala kwa difùkà dya dyulu ne buloba.”

⁷³ Mmunyi muvwa Nzambi, Yèyè udi kayi mikalu, mmunyi muvwa Nzambi udi kayi mikalu, mumanye ndekeelu kumpala

kwa ntwadijilu, mmunyi muvwaYe mufwanyine kwitabila mpekaatu bwa kulwaye pa buloba, piikalaci kacyi bwa kabingila kampanda?

⁷⁴ Anu bwa kutwa mpindyewu nyama ku mikolo bintu kampanda bitudi bambe. Ukaavwaku kumpala nganyi, Musungidi anyi ngènzàmpèkààtù? [Muntu kampanda mu disangisha udi wamba ne: “Musungidi”—Muf.] Musungidi, cya bushuwa. Udi mutambe bukole ke nganyi, Musungidi anyi ngènzàmpèkààtù? Piikala Musungidi ne bukole bwa kuumusha mpekaatu, Yèyè udi mutambe bukole. Nenku, bwa cinyi Yèyè wakalekela mpekaatu wenzeka ku cibangidilu? Bwa kuleeja ne Yèyè nguwva Musungidi. Udi mutambe bukole nganyi, mwondopi anyi disaama? [“Mwondopi.”] Mwondopi. Kadi bwa cinyi Yèyè wakalekela disaama dilwa? Bwa kuleeja ne Yèyè uvwa mwondopi. Ngädyümvüku mutendeleedi mpindyewu. Eyowa’s, mukalenge. Kaa, ekelekele! Ke byambibwa Byende mbyòbi abi.

⁷⁵ Ke bwa cinyi Yèyè utu ulekela lutatu lulwa. Ke bwa cinyi utu ulekela tunyinyangya tulwa, bwa kuleeja ne Yèyè ke udi disanka. Cya bushuwa, ke mudibi. Ke bwa cinyi tutu ne bufuku, bwa kujaadika ne mundaamuunya mutuku. Ke bwa cinyi tutu ne ciiji, bwa kuleeja ne kutu ditalala. Cya bushuwa, bidi anu cimpè ne cibi. Kaa, Yèyè’s mmukemeshanganyi.

⁷⁶ Mpindyewu, cyakabanga bishi? Netuye buludi ku cyòci aci, tuyaku ne lukasa lwònsò, bwa nçilu kunulama bufuku bujima. Mpindyewu, kudi ne cya kwikala ntwadijilu wa bintu byònsò.

⁷⁷ Nenku ndi njinga kunukonka cintu kampanda. Mpindyewu eci cidi mwa . . . Uçibweje anu mu mpaaya wa nkooci webe amu. Kabyena bikengela bwa wèwè kwela cyòci eci kucisambakaja ne byakudya bya mu dilongo dyebe dya ciibidilu to. Kadi teejeja eci nenku.

⁷⁸ Pawikala cifükübwà cya Cyendeleele, nanku kutu mwanji kwikala ne ntwadijilu, anyi kwèna mwa kwikalaku ne ndekeelu nansha. Bwalu, wa *Cyendeleele* udi ufuma ku mwaku udi wamba ne “udi kayi ne ntwadijilu anyi ne ndekeelu.”

⁷⁹ Kanwena bacivuluke anyi? Mvwa mwambe, mu dinda emu, muvwa Melekisedeke, paakatuutakeenaye ne Abraham pavwaye ufuma ku dishipa dya bamfumu. Nenku Bible mmwambe, mu Ebelu 7, ne—ne: “Lewi wakafuta byadiikumi kudi Melekisedeke, pavwaye mu twonyi twa tatwëndè Abraham.” Abraham kulelaye Izaka; Izaka kulelaye Yakobo; Yakobo kulelaye Lewi. Aci civwa taatu, kaaku, ne kakwëndè wa taatu. Nenku pavwa Lewi mu twonyi twa kakwëndè wa tatwëndè, Bible udi umupa luumu lwa ne wakafuta byadiikumi kudi Melekisedeke. Nwèñu badi baakula bwa wa Cyendeleele! Ekelekele, ekelekele! Katu mwambeku ne: “Yèyè wakacyenza mu cimfwanyi; wakacyenza mu mushindu kampanda” to. Bible mmwambe ne: “Wakafuta byadiikumi.” Amen.

⁸⁰ Nenku, piikalabi ne twêtù aba tudi bavwile mu dimiinu dya bushuwa, pavwa Pòlò uyiisha Evanjeeliyo apu mêmè mvwapu ne wêwè uvwapu. Netubwele mu cyôci aci, anu mu kasunsa kamwe cyanaana, tubanda too ne ku maci etu. Monaayi, ke cidi Mufundu utwambila, twêtù, walukila ne paanyima menemene.

⁸¹ Anji elaaayi meeji! Lewi; pashiishe Yakobo, tatwëndè; pashiishe Izaka, tatwëndè; pashiishe Abraham, tatwëndè; kakwëndè wa tatwëndè. Pavwa Lewi mu twonyi twa kakwëndè wa tatwëndè, ke paakafutaye byadiikumi kudi Melekisedeke.

⁸² Ndi muswe kunukonka. Ewu nganyi, Yobo 27...38, paakambaYe ne: “Wêwè ewu uvwa penyi pâmvwà nteeka bishimikidi bya buloba? Pavwa mitotoo ya mu dinda yimba cyapamwe, ne bânà baa Nzambi beela mbila ya disanka?” Bânà baa Nzambi bavwa beela mbila ya disanka abu bavwa mbanganyi? Yesu wakabambila, ne: “Mvwa nsanka neenu kumpala kwa difùkà dya dyulu ne buloba.” Twêtù aba katwena bifukiibwà bya cikondo to. Tudi bifukiibwà bya Cyendeleele.

⁸³ “Muntu nansha umwe kêna mwa kulwa Kùndi, anu Taatu mumukoke. Ne ewu yônsò udi ulwa Kùndi, Mêmè nêmmupè Mwoyi wa Cyendeleele, ne nêmmujuulè ku matuku a ndekeelu. Muntu nansha umwe kêna mwa kumunyenga mu cyanza cya Taatu Wanyi, Udi mumuMpe.” Neujimije bishi?

⁸⁴ Mona, udi ne bwôwà. Udi uciina. Neunyeemakane eku ne eku mwaba ewu. Nenku ke cimwe cya ku bileeji bya bitambe bwîmpè, pa buloba apa, cya ne wêwè kutu mwanji kwikalaku pa kaaba nansha kamwe to. Neya bushuwa. Mmunyi mudi Nzambi mwa kukusungila piikalaYe. . .

⁸⁵ Mbanganyi mu ekeleeziya emu badi bafwanyine kwela byanza muulu, ne kwitabuuja ne Nzambi utu kayi mikalu? Nudi bamanye cidi mwaku ewu *kayi mikalu* uumvwija anyi? Mupwangane anu wetu ewu. Kayi mikalu, kanwena—kanwena mwa kuumvwija mwaku *kayi mikalu* to.

⁸⁶ Ukaadiku mwangate cyamu cyebe cya fôtô muciteeke mu mushindu wa mèsù kacya anu aaya? Mona’s, cidi ciswa kwamba anu ne kubangila mwaba udici awu kadi kuya. Eyo. Kakuciyi kabidi mushindu wa kuciludikila to.

⁸⁷ Ee, ke cidi Nzambi aci. Yêyè kêna ne mikalu to. PiikalaYe kayi ne mikalu, kî nkufwanyine kwikala nî ncijangalala, anyi lujijji, anyi nkùpà, anyi nkùsù, anyi kabwasa, anyi cintu nansha cimwe cikaadiku pa buloba ebu, anyi ciikalaku, civwa Nzambi kayi mumanye kumpala kwa dyenjibwa dya dyulu ne buloba to. Kudi mmwenenu kampanda wa cidi kaciyi mikalu.

⁸⁸ Ee, nenku, Nzambi udi kayi mikalu Mwikale ukusungila mwaba ewu, mwikale mumanye ne Yêyè neakujimije lumingu lulwalwa elu, anyi ngondo ulwalwa ewu, anyi cidimu cilwalwa eci, mona’s, Yêyè’s udi unyangakaja kiipacila kiine. Kêna mwa kukujimija to. “Ewu udi uteeleja Mèyi Aanyi, ne witabuuja

Ewu udi muntume Mêmè, udi ne Mwoyi wa kashidi ne yèyè kaakupicila ku Cilumbulwidi to, kadi ukaadi muumuke ku lufu muye ku Mwoyi.” Kêna mwa kucyenzaku to. Kwêna kabidi mufwanyine. . .

⁸⁹ “Ewu udi mulela kudi Nzambi kêna wenza mpekaatu to; bwalu dimiinu dya Nzambi didi dishaala munda mwende, ne kêna mwa kwenza mpekaatu to.” Mmuniy mudiye mwa kwenza mpekaatu padiku mulambu wa mpekaatu bwende yèyè?

⁹⁰ Mmuniy mûndi mwa kwikala nsaama pândi mwikale ne mubidi tumatuma? Mmuniy mûndi mwa kwikala mpofo piikalabi ne ndi mmona? Kaa, ekelekele! Mmuniy mûndi mwa kwikala munda mwa nzubu kadi mwikale pambelu paa nzubu musangu umweumwe awu? Mmuniy mûndi mwa kwikala mukwacike ne ku mèsù kutenduke musangu umweumwe awu? Kacyena mwa kwenzeka to.

⁹¹ Nenku paudi musungidiibwe, udi mwinshi mwa Difuta dya cibawu, ne mpekaatu yebe kabeena bakubadilayi to. Davidi kaakambaku ne: “Dyakalenga didi kudi muntu udi Nzambi kayi ubadila mpekaatu, ne kayi umubalulwila mpekaatu” anyi? Nzambi katu ulaminyina cifûkiibwà Cyende mpekaatu nansha. Aci ncikole. Aci kî mmabeele matotesha to. Kadi m’Bible. Nzambi kaakubadila muntu mwakane mpekaatu nansha.

⁹² “Nzambi,” ku ngàsà Wende, ku didyanjila kulongolola, “kayi muswe bwa ne muntu kampana afwe to, kadi bwa bônso bafike ku kanyinganyinga.” Kadi mwikale kayi mikalu, ne mumanye ne nganyi wâlwa ne nganyi wabenga kulwa, Yèyè uvwa mwa kudyanjila kulongolola maalù ônsò bwa kukwatawu mudimu bilondeshile diswa Dyende. Piikalabi ne Yèyè kavwa mwenze nanku to, kadi Yèyè wakanji kwitabila mpekaatu dyambedi bwa cinyi? PavwaYè mwikale Musungidi. . . Bu ne kakuvwaku kwanji kwikala ngènzàmpèkààtù to, Yèyè kavwaku mwa kwikala Musungidi to; cyambiibwa aci, civwa munda Mwende aci, kacivwa mwa kwikala cipatudiibwe patooke to.

⁹³ Mmuniy mwakashaalaYe mene mwondopi? Mmuniy mwakashaalaYe mene mwondopi? Mbwalu Yèyè wakiitabila disaama bwa kulwadi, bwa Yèyè wamona mwa kudileeja Yèyè mwine mwondopi. Yèyè uvwa mwondopi. Mmuniy mûvwà wèwè ewu mwa kwikala. . . Mmuniy muvwàYe mene mwa kumanyika? Mmuniy muvwà mene cyambiibwa Cyende aci mwa kukwata mudimu? Mmuniy muvwàYe mene mwa kwikala mwondopi, bu byôbì ne kakuvwaku disaama nansha dimwe? Bivwa bikengela Yèyè itabile disaama.

⁹⁴ Kabyena bikemesha to, paakamba Pòlò, mu Loomo 8 ne: “Muntu mukutakane we, nganyi udi mwa kwambila mu—mufumbi cidì cikengela kwenza bwa bwalu abu; nganyi, paakajuuka diima kwamba ne: ‘Bwa cinyi, wèwè, ungenza mushindu ewu?’ Yèyè kî ngwàkajuula Pàlò bwa kiipacila

kamwekamwe aku, bwa Yèyè wamona mwa kuleeja bukole Bwende mu Ejipitu anyi? Yèyè udi ukolesha mucima wa udiYe muswe kukolesha, ne Yèyè udi ubingisha udiYe muswe kubingisha. Kî ngewu udi muswe, anyi ewu udi unyeema lubilu, kadi n'Nzambi udi uleeja luse."

⁹⁵ Pa nanku, wèwè kî nguvwa ne bwalu bwa kwenzamu to. Kwèna ne cintu nansha cimwe cya kwenza to. Piikalabi ne nngàsà, piikalabi ne ndipà dya kuyi ufuta kantu to, kakwena cintu nansha cimwe cyùdi mwa kwenza pa bwalu abu to. Nzambi ngudi mukupe cyôci aci, nenku ke diswa dya Nzambi ndyadi. Ke cintu cidi Nzambi mudyanjile kukulongolwela.

⁹⁶ Bible mmwambe ne "tuvwa badyanjila kulongolola bwa kwikala bânà baa balume bwa diteekibwa, bânà baa balume baa Nzambi, kumpala kwa difùkà dya dyulu ne buloba." Nenku, paakashipa Nzambi Mwânà wa mukooko, mu meeji Ende Yèyè mwine, kumpala kwa difùkà dya dyulu ne buloba, bwa kujaadika byambiibwa Byende, civwaYe aci, paakashipiibwa Mwânà wa mukooko, twákashipiibwa Nende. Paakalamiibwa Mashi a Mwânà wa mukooko mu meeji Ende Yèyè mwine, kalekale wawa kumpala kwa difùkà dya dyulu ne buloba, dînà dyanyi ne dînà dyebe akafundiibwa mu Mukanda piine apu, ônsò mu meeji Ende manene.

⁹⁷ Yèyè kèna ne mikalu to. Piikalabi ne Yèyè kavwa mwenze nanku to, mbwa cinyi bwakaciitabilaYe? Udi mutambe bukole nganyi, (bu mûngâmbi) Musungidi anyi ngènzâmpèkâàtù? Udi ne dikanda ditambidile nganyi? Nanku, udi ne dikanda ditambidile awu's ngudi witabila udi mushaadile, nenku Yèyè udi ucyenza anu bwa butumbi Bwende. PaakafùkàYe Lucifer, Yèyè's uvwa mumanye ne neikale dyabulu. Bivwa bikengela acilekele mwaba awu bwa kuleeja ne Yèyè uvwa Musungidi, Kilisto. Bivwa bikengela acilekele cyenzeka mushindu awu.

⁹⁸ Mpindyewu, Bible kèna wambaku, ne: "Maalu ônsò adi akwata mudimu bwa dyakalenga dya badi banange Nzambi" anyi? [Disangisha didi dyamba ne: "Amen."—Muf.] Mwaba awu bwôwà bùdi naabu mbwa cinyi?

Tujuukaayi bwa twènzè mudimu,
Biikale ne mwoyi wa mvita kana yônsò.
Kwikadi ngombe idibo benda basaka cimuma,
bikengela bakusengeleele ne bakutwishe to!
Nenku ikala cilobo!

⁹⁹ Ntu munange aci. Juukila kuulu! Kasala kakese kavwa kankwacisha mèmè ewu pâncivwà mwânà, kiikale kamba cintu nunku ewu:

Kuvwa eku mwena Loomo mwende luumu,
Mu matuku a Bukalenga bwalabale bwa beena
Loomo;

Wākumvwa mutulumuke kampana wa dīyì
 dipate,
 Kumpala kwa nzubu wa bukalenge wamba ne:
 “Kaa, mudi dikubiibwa be mu mucu wa sapin
 bu ewu,
 Kakwena udi mwa kuwunyukushaku to.”
 “Kaa, to,” mwakamba cilobo aci,
 “Mémè nènkebè mushindu anyi nēncyēnzè.”

¹⁰⁰ Ke bwalu abu’s. Ncya bushuwa. Piikala Bible ewu ulongesha ne Yesu Kilisto udi umweumwe awu makeelela, leelu, too ne kashidi. . . Kacivwa cintu cipeepele to pāngàkapàtukà mu tabernacle ewu dituku adi, ne bantu bōnsò biikale bangambila ne *cikampanda* necyenzeke, ne *cikansanga* necyenzeke. “Wèwè udi mufwanyine wa bantu bangata bu mukoleshi wa maalu, bakwela mu buloko, ne nsangilu mujima wa maalu a dyondopangana mufwanyine kukulwisha.” Kadi Nzambi’s nguvwa mwambe bwa kucyenza. Bible ngudi mwambe ne ke civwaYe. Kadi mpindyewu’s kapyà kaa ditabuluja kakaadi kateeme mu ditunga ne ditunga dyōnsò mwinshi mwa Dyulu. Bwa cinyi? Ucikandameene!

Utu ubundula mudimu webe dituku dyōnsò
 bishi?
 Udi ne bwōwà bwa mudimu ûdì upeta anyi?
 Udi mwa kwimana kamungulu bwa mudimu
 ulwalwa anyi?
 Udi ne meeji macyoke ne a munda mutupu
 anyi? (Mémè ntu mukine aci cintu.)
 Anyi udi wimana kamungulu bwa mudimu
 ulwalwa,
 Anyi bwōwà ke budi bwendakanamu?
 Byòbì nanku, bundula udi ulonda ûdì upeta
 awu,
 Mwikale udyambidila ne neùwēnzè.

¹⁰¹ Shaala naawu. Cya bushuwa. Udi pangadikile mu mwoyi webe, bu Danye. Shaala ne Nzambi.

¹⁰² “Byōnsò ebi mbyenzekele penyi? Mbyenzeke mene bishi? Cidi cyenza bantu nunku ewu ncinyi? Bwa cinyi tukaadi anu pabwìpì menemene ne kubutudiibwa? Mwaneetu Branham, ngumvwijaku tūng. Ncinyi cidi cikwelesha meeji ne cintu cyōnsò eci mu kaabujima cidi ne cya kubutudiibwa?” Cikaavwa cibutudibweku musangu kampana kumpala, (mmwômò anyi?) mu kabutu kaa mvula wa Noa. Mpindyewu ke bimwe bintu bya mu ndondo bilwalwa ebi. Nenku netudilongolole bwa kubala.

¹⁰³ Mpindyewu ndi muswe nubuulule naanyi mpindyewu, mu Mukanda wa Genese, mu nshapita 3. Nwènù nujinga kumanya cintu kampana, ndi mwa kunuleeja mu Mukanda ewu wa Genese mwaba udi ntendeleelu yōnsò ne kasumbu kōnsò, ne

byònsò bitudi naabi leelu wa Ndaaya ewu ebi, bibangile mu Genese. Mbanganyi badi bamanye ne mwaku ewu *Genesis* udi uswa kwamba ne “mbangilu”? Cya bushuwa.

¹⁰⁴ Tudi tusangana ekeleeziya wa Katolike ku cibangidilu, Baabulona, Nimrod mwikale mumwashi; tudi tumusangana munkaci mwa Bible, tudi tumusangana kundekeelu kwa Bible; tudi tusangana, uteeta bwa kutwala bayiishi bakaji, ku mbangilu wa Bible, mu kukuukwila kwa tupingu tukese tudibo benze ne miji ya mici. Mbanganyi bakaadi babale *Baabulònà Ìbìdì*, wa Hislop, maalu malonda? Eyo. Nujandulaayi, mu maalu malonda aa. Bavwa ne mukaji. . . Ne pashiishe, nudi bavuluke anyi? Nansha Yakobo wakiiba nzambi ya tatwèndè, nenku mwanende wa bakaji kuyisokokaye mwinshi mwende ne kulwa kuyipatula mu cipeela mwamwa, cyakakooyisha cituudilu, paakapita matuku. Eyo.

¹⁰⁵ Tubalaayaaku mpindyewu mu Genese emu.

Mpindyewu nyoka nguwwa mudimuke kupita nyama yònsò wa mu mpàta uvwa MUKALENGE Nzambi mufuke. Ke kwambilaye mukaji ne: Eyo, Nzambi mmwambe ne: Kanudi ku mucu wònsò wa mu budimi anyi?

. . . mukaji kwambilaye nyoka ne: Tudi mwa kudya ku mamuma a mici ya mu budimi,

Kadi mamuma a mucu. . . munkaci mwa budimi, Nzambi mmwambe ne: Kanukudi to, anyi kanukulengi to, bwa kanulu kufwa.

Nenku nyoka kwambilaye mukaji ne: Bulelela kanwakufwa to,

Bwalu Nzambi mmumanye anu bimpè ne dituku dinwakudya, pa dîbà adi mèsù enu neatabale, (Nwamonu's, dyenda dikebangana ne Bukênkè bupyabupya), nenku nenwikale bu banzambi, bamanye maalu mimpè ne maalu mabi.

¹⁰⁶ Nudi numona mudi balumyana aba leelu ewu, bateeta bwa kuumushila ku Bible? “Mona's, kî mbipeepeleku bwa kwikala kupongolwelangana, anyi kumyaminangana màyi pa mutu, anyi mushindu *kampanda*, anyi mushindu *kansanga* anyi?” To, mukalenge. Nzambi mmuteeke ndongamu, nenku yêyè awu ke utudi ne cya kulonda, *Ewu*.

Nenku paakamona mukaji ne mucu uvwa mwimpè bwa kudya, ne uvwa wenza disanka ku disù, mucu bwa kuvwija. . . ukengela kujinga bwa kuvwija muntu ne lungenyi, yêyè wakangata bimuma byawu, ne wakadya, ne wakapa pende bayende uvwa nende; ne yêyè wakadya.

Ne mèsù abo bônsò babidi akatabala, ne baakamanya. . . bavwa butaka; ne baakatelakaja mabeji a mfigi, ne baakadyenzela wôwò awu mbondya.

¹⁰⁷ Ndi njinga kwimana kaaba aka ndambu. Mpindyewu, kuvwa ne cya kwikala mbangilu wa bintu byônsò. Wêwê uvwa ne mbangilu. Mpindyewu twêtù. . . Mwaba ewu ke ûndi njinga kuteeka nshindameenu wa cintu cyônsò mu kaabujima, mpindyewu, citudi bambe mu masangisha abidi a ndekeelu aa, too ne apa.

¹⁰⁸ Mpindyewu, mu dinda emu tudi baalukile cyanyima kadi kubileeja bu dinaya, mu Bible ne, pavwa Nzambi wenza buloba, pashiishe pavwaYe wenza ma-gaz; ne pashiishe ma-gaz awu kwandamukawu calcium, ne potasse, ne—ne bintu bishiileshiilangane. Uvwa munkaci mwa kwenza mubidi webe. Uvwa munkaci mwa kwasa nzubu, mushindu udi mwibaki mwikale mulongeshi munene, mwenze bu mwenji wa makumi a bya dyasa naabi uteeka bintu byende bya dyasa naabi nzubu. Uvwa munkaci mwa kwenza mubidi webe, nenku Yêyè uvwa munkaci mwa kuwadija mwaba awu. Yêyè uvwa mumanye anu menemene, mu meeji Ende, civwa ne cya kwenjiibwa.

¹⁰⁹ Cyanza eci, Nzambi wakenza cyanza aci kumpala kwa Yêyè. . . pavwaYe munkaci mwa kwenza dyulu ne buloba apu; kadi, nyuma wanyi Yêyè wakamwenza kumpala kwa dyulu ne buloba kabiyi byanji kwikalaku to. Mpindyewu, kadi cyanza eci ne mubidi ewu, Yêyè wakabyenza pavwaYe munkaci mwa kwenza dyulu ne buloba apu, bwalu mubidi ewu mmufumine ku buloba, ne newalukile ku buloba. Nzambi ke wâkenza nanku. Wakawadija wônsò mu karta Kende kanene ne mu ndongamu Wende.

¹¹⁰ Mpindyewu, paakabangaYe kwenza buloba, ke paakenzaYe muntu, kadi muntu awu kavwa anu ne mmwenekelu mujaalame to. Mpindyewu twamonu cyôci aci, mu dinda emu, twâlongù dinaya adi, mushindu uvwa—uvwa Taatu utuuluka mwikale ulwa kwela mwânà Wende wa balume dîsù, mwenza mu cimfwanyi Cyende, ne bikwabo. Pashiishe kumwenzelaYe mukaji, mukwacishi.

¹¹¹ Mpindyewu, nwavulukaayi, ne, bifùkiibwà byônsò bya pa buloba ebi, Adama ngwâkabînyika mênà.

¹¹² Ukaavwa mwenze ngo—ngombe, ne nyama, ne bintu byônsò. Kadi leelu ewu, tudi. . . Balondolodi ne—ne beena meeji banene baa maalu a mamanya bashiileshiilangane, mbateeteete, kukaadi bidimu binunu bisambombo, bwa kujandula dinungu didi dipangike adi, bwa cinyi nyama awu. . . Muntu mmwoyi wa nyama. Tudi bamanye aci, bwa ne tudi benza. . .

¹¹³ Ne mukaji udi anu citùpà cya mulume, cintu cyangata ku cikwabo. Mukaji kavwa mu bufùki bwa ku cibangidilu to. Nzambi ukaavwa mumane kulekela difùka, kukaavwa bidimu

ne bidimu ne bidimu, too ne paaluYe kwenza mukaji ku lubadi luumusha mu luseke lwa mulume. Adama ukaavwa mumane kwinyika bifùkùibwà byònsò mènà, bintu bikwabo byònsò, kadi kakuyi cintu nansha cimwe bwende yêyè mwine to. Pa nanku, Yêyè kumwenzela mukwacishi; kwangata lubadi mu luseke lwende amu, kujibikila disoso adi, e kumwenzela mukwacishi. Ne muntu mwine, mu nyuma wende amu, uvwa byònsò bibidi mulume ne mukaji.

114 Ne mukaji udi anu citùpà cya mulume. Nenku padi mulume usela mukaji, ne yêyè mwikale menemene mukajende, mukaji mumupa kudi Nzambi, neikale kudiye anu citùpà cyende.

115 Ke bwa cinyi nudi ne bilema bûngì cyanaana mu dibaka, mbwalu udi upatuka ukamona mwâna wa bakaji kampanda mwikale ne mèsù malenga mafiikuluke anyi mèsù a bleu, anyi cintu bu nanku awu, ne kwîsù kwenze kulenga, peebe umba ufwa bwende yêyè. Musangu wa kumpala udiye anu upeta wende mwânà wa kumpala, mènù awu apooka, wela minyengu ne ukulakaja, pa dîbà adi wêwè kujinga kumwipata. Ne bamwe ba ku nwènù bakaji peenu paudi upetangana ne kânà kaa balume ne tusuki tufinunuja, ne kandundu kaa mafuta kaa mamwëndè kapumwinamu citùpà cijima, ne nsuki mvwangala. Kadi byònsò abi's nebituutuke; ndi mêmè mubimanye ku maalu mamonamona. Kadi cidi cyenzeka ncinyi? Ncinyi? Wêwè peebe umba ufwa bwa biine abi.

116 Bivwa bikengela wêwè kusambila, dyambedi, bwalu mukaji ncitùpà cya ku wêwè. Nenku pawikala mwele mukaji citùpà mumutwe mu cyâdi cyebe, ne mumwangate bu mukajeebe, ne wêwè. . . Udi ushiya citampi pambidi peebe. Netwâmbè bwalu ebu mushindu ewu bwa nufike ku dyumvwa. Nenku mukaji mukwabo yònsò uwatwa mu cyâdi aci kaakukumbanangana ne citampi aci to. Nenku Nzambi ke wâkwela bwalu abu pambidi. Nenku nwavulukaayi anu cyòci aci.

117 Wêwè utu wangata mukaji wa muntu mukwabo upatuka nende ne. . . Mvwa muumvwe bamba leelu ewu bwa kânà kaa bakaji katekete muneemu mu cimenga emu, kânà kakwate ne bya luse. Ntu mukamanye. Nenku munayi kampanda wa twarta twa mfranga umusumbila anu bilâmbà binene bîmpè, ne bintu bikwabo, mwikale uteeta kwikala kunaya nende mushindu awu. Nkose, ewu udi mufwanyine kwenza cintu bu nanku awu, kèna nansha mwa kubadiibwa bu ne mmuntu wetu ewu to.

118 Nudi bamanye, mbwa katu ne bushaadile bwa mushindu awu to, cibi nudi biinyike mbwa mukaji ne “keena masandi.” Yêyè awu's utu ne maalu a nsòmbelu mîmpè kupita cyabibidi cimwe cya bakaji baa mu Jeffersonville emu. Ne nutu biinyike ngulube mukole mukaji ne “cingendaamasandi,” kadi pende's kèna. . . Yêyè awu udi ne maalu a nsòmbelu mîmpè kupita bakaji baa mu Étas-Unis aba, bàâbûngì baa kudibo. Aci ncyà

bushuwa menemene. Mpindyewu, ndi mumanye ne abi mbya ciipanshi. Kadi nkaavwa munwâmbile ne nênteekè kantu ne kantu pa kaaba kâàkù, ne ndi muswe nubimanye. Ne ncyà bushuwa. Bwônsò bwabo, bakaji baa leelu ewu aba, kabeena nansha bamanye ne maalu a nsômbelu mene ncinyi to. Bakaadi bambambe ne: “Kuntapi ku kondo kaanyi kaa mwoyi to.” Ee, wêwè mwine kwêna naaku to. Mona. Eyowa’s, mukalenge. Bya bwalu, wêwè ewu’s udi mumanye cidi cîmpè ne cidi cibi.

¹¹⁹ Monaayaaku mpindyewu. Muntu ewu, pààkafùkiibwàye, Nzambi wakaabulula nyuma wende. Nenku Yêyè kwangata katupa ku muntu, mu luseke lwende, kwenza naaku mukaji. Ke pashiishe kwangataYe nyuma muntu wa bukaji, wa bwena utu munange anu kuvwala bilenga awu, kwenza nende mukaji. Ke kwenzaYe mulume mwikale ne bulume, mupayame.

¹²⁰ Kadi panudi numona mu—mu—muntu mulume mwikale ndambu. . . nudi bamanye, udilengeja byanza, anyi munutu nucibiikila amu, nzadi ya ku minu; nenku, nudi numona, inaayi elu luseke ne itaanu luseke lukwabo, ne—ne mwikale ufinunuja nsuki; bwa kulama mukana mulekelela kumpala kwende, ne bintu bya mushindu awu; umwe wa ku bânà baa balume baa balenga kwîsù aba. Nwavulukaayi anu ne, nwênù baayaaya, kudi cintu kampanda cipampalamuke mu nyuunyi awu. Kudi cintu kampanda cipampalamuke. Mbîmpè umudimukile.

¹²¹ Nenku paudi umona muntu mukaji ne mucu wa mfwanka ku luseke lwa mishiku eku, muvwale nsalabeeta, wamba ne: “Mêmè’s nênkwambilè, mulumyana, nkwambila cyôci aci!” Mwaneetu wa balume, watapa ntaala wadimuka ne nsongakaji awu. Kudi cintu kampanda cipampalamuke mu yêyè amu.

¹²² Mukaji, wa bwena udi ne cya kwikala mukaji awu, udi ne cya kuvwala bilâmbà bu mukaji. Paakenza Nzambi mulume, Yêyè wakamwenza mwikale cintu cya mushindu, ne Yêyè wakenza mukaji cintu cikwabo paaci. Nenku padi Nzambi uvwadika mulume, Wakamuvwadika mushindu kampanda, ne mukaji mushindu mukwabo. Ne Bible utu mwambe ne: “Ncinyangu bwa muntu mukaji kuvwala cilâmbà cidi cikumbanyina muntu mulume.”

¹²³ Nenku nwênù bakaji, badi bavwala tupanu etu ne bikwabo, nubivwala pambelu apa, tulumyana twa kale. . . Nutu mene nutubiikila ne ntunganyi, tupanu twa tushiikile mu binù atu? Batu ba- . . . ? Kaa, ncintu kaayi aci citubo ba- . . . ? To, to, kî ntuputulu to, ntukwabo atu, tûdi ne mikolo mile munda atu. [Disangisha didi dyamba ne: “Kapanu kashiikile mu mabunda.”—Muf.] Kapanu kashiikile mu mabunda, ne nsalabeeta, bilâmbà bya dyenza naabi mudimu.

Ubwelamu, bamba ne: “Ebi mbya bainâbânzà.”

124 Mémè ne: “To, nudi batupakane. Bainābànzà kabatu bavwala bintu abi to. Bakaji mbadi bafwanyine kubivwala, kadi kî mbainābànzà to.” Neya bushuwa.

125 Bible mmwambe ne: “Ncinyangu bwa muntu mukaji kuvwala cilàmbà . . . ne bwa muntu mulume kuvwala cilàmbà cidi cikumbanyina muntu mukaji.”

126 Ne mulume mwine ukaadi wenda utamba kulwa cilumaacikaji, ku dituku ne ku dituku, ne bakaji bakaadi benda batamba kulwa ne bulume bwàbûngì. Mbwalu kaayi ebu? Netujandule mu tusunsa tukese emu, ne Bible. Bakaji kabacyena bakaji kabidi to. Bândi nswa kwamba kî nnnwênù bakaji beena Kilisto to. Ndi ngakula bwa nkwaka wa mwasakanaayi ewu. Mbaswe kwikala benza maalu bu bantu balume; mbaswe kwikala bakosa nsuki yabo bu balume; babandisha cyanza baciteeka pa meesa a cinwinu, mushindu ewu, kadi kwimba musambu wa *Nzambi Àbeneshè Àmèrikè*, ne mucu wa mfwanka ku luseke lwa mishiku.

127 Bapweka ne mùsèsèsù, bapatuka cyanyimanyima mushindu ewu, kabidi anu mu cibeeba amu. Tuvwa babale . . . Ndi muswe kunwambila cintu kampanda. Ne nwênù baakanyeemesha bakaji, teelejaayi. Mémè ne Billy Paul, mu kampanye kaa ndekeelu kaa eku ne eku mu ditunga aka, ngondo isambombo, ndi mulame bûngì bwa bilema bya mu njila. Ne pa njiwu nkama isatu, mu njila, nudi mwa kucinka bûngì bwa baakanyeemesha bakaji munkaci amu? Kuvwa kupangika anu . . . Dikumi ne citeema baa kudibo bavwa mbalume. Nenku nkama ibidi ne makumi mwandamukulu anyi, ngela meeji ne mmuvwabi, nkama ibidi ne makumi mwandamukulu ne umwe bavwa bafwanyine anu kwikala baakanyeemesha bakaji. Baakanyeemesha bakaji! Mpindyewu, ncyêna ngamba ye baakanyeemesha bakaji baa bîmpè kabatuku to. Kadi yêyè neatume mashinyi luseke lwônsò cyanaana.

128 Kadi adidinge anu amwase cilumbu? Yêyè ãnjì anu ikale ne musangeelu ne kwisù kulenga aku, mwimane mwaba awu, mwikale usaamuna nsuki padi mpulushi wenda useemena apu. “Aka,” mudiye mwa kwamba, “bushuwa, wêwè ngudi mu cilema!” Hmm! Katwenaku ne mikenji to.

129 Baajaadiki cyôci aci dituku adi mu cilumbu cya citadi mûndì mfuma ku dipicila emu. Twêtù katwenaku ne mikenji to. Kwôkò kwikale . . .

130 Kabyena bikemesha to padi bakalenge banene baa Angleterre bambe ne: “Mungalaata uvwa mwenza anu ne bilàmbà bidi bikwata lupeepele pa byôbi kadi kakuyi lwôngò to.” Neya bushuwa, biimane pa kasheete ka nsabanga, munkaci mwa kudiswisha. Mungalaata ukaadi mubole, bya mwomumwe ne bamfumu baa cimbambila ne bakwabo bônsò. Cintu cyônsò mu kaabujima cikaadi cibole. Kudi cintu anu cimwepele cidi

Nzambi ne cya kwenza, nkubutula cidi cyônsò mu kaabujima, bu mwakambaYe ne Yèyè neenzè, kadi kubangulula. Mpindyewu tangilaayi anu numone munukaadi pabwîpî ne Dilwa.

¹³¹ Mpindyewu paalu mukaji ewu...Yèyè kumwenzela mukwacishi, ne bivwa bikengela yèyè ikale mukwacishi kudiye. Nenku pathiishe... .

¹³² Mpindyewu, mwaba ewu, nciitu mwanji kupetaku muyiishi nansha umwe mwikale witaba cyôci eci to. Bôbô badi bateeta kucivwija mushindu mukwabo kampanda, kadi aci kaciyena cimweka kûndi bu cya meeji to. Badi bateeta kwamba ne Adama ne Eva baakadya bimuma kampanda bya pommès. Mwanetu, piikala... Mpindyewu ncyèna ngamba bwalu ebu bwa kuneka to, kadi ndi muswe kubwamba. Bwalu, piikala kudya kwa bimuma bya pommès kufikisha bakaji ku dimanya ne badi butaka, mbîmpè bwa twètu kubadiisha cyakabidi bimuma bya pommès. Ne nwênù's nudi anu bamanye ne aci ncyà bushuwa.

¹³³ Nudi bamanye, kudya kwa cimuma cya pomme, kî ncyôci aci cyakenzabo, cyakabafikisha ku dimanya ne bavwa butaka to. Bushuwa, kacivwa aci to. Civwa ne cya kufika ku masandi. Civwa ne cya kwikala aci, bwalu baakafika ku dimanya ne bavwa butaka paakangatabo cimuma cikandika eci. Mukaji katu mucu wa bimuma anyi? Wèwè kwèna cimuma cya mamwèbè anyi? Ke cimuma ncyaci cyakabakandikabo bwa kwangata.

¹³⁴ Mpindyewu cintu cinene ncyeci. Mpindyewu cidi maalu a mamanya mapeteku ku dimanya dya civwa citambe kwikala ciseemene pamwe ne muntu civwa...Bôbô badi bumbula mifuba ya kale, bangata bishààdîlè bya mifuba, bangata mitù, bangata tubalubalu twa mitù, ne maboko, ne mifuba, nenku bateeta kwenza bwa bimweneke bu bifwanangane ne muntu. Paabo's mbamanye ne cintu cidi citambe kwikala ciseemene pamwe ne muntu cikaadibo bafikeku ku dipeta, ciseemenenangane nende, nnsòkòmuntù. Yèyè ke nyama wa mushindu udi mutambe kwikala museemene pamwe ne muntu; kadi nansha nanku kèna ne cidiye ciine to pa kutangila mudi muntu, mutambe kubàndila.

¹³⁵ Mushindu wa mwoyi udi mutambe kwikala kwinshi ndudimba; mushindu udi mutambe kwikala kuulu, mmuntu. Nzambi wakabangila kwinshi ne wakaya wenda ubanda, too ne mwakacifikishaYe mu cimfwanyi Cyende. Kubanda naaci kupicila ku nyuunyi ne ku nyama, wenda ubanda, too ne mwaluYe kufika ku cimfwanyi cya Nzambi. Wakenza muntu mu cimfwanyi aci. Ke mushindu udi mutambe kwikala mubàndîlè. Mushindu udi mutambe kwikala kwinshi udi anu civuba cidi cilwe kwandamuka ludimba, ne bikwabo.

¹³⁶ Mpindyewu dinungu didi dipangike edi, didibo kabayi mwa kupeta edi. Tangilaayi Mifundu mpindyewu. Nwênù, nenwikale mwa kubenga cyôci eci, bààbûngî beenu, kadi ndi mêmè

muswe... Ndi muswe anu bwa kanucipu mwoyi to. Nenku kanuumvu binutacisha bya nwènu bafwanyine kucibenga to. Teelejaayi.

¹³⁷ Ndi mumanye ne bààbûngì beenu mbafume ku diteleja Ngangabuka DeHaan. Mbushuwa ne mêmè... Yêyè muntu wa cipidi cyende aci, ne mwaneetu mwîmpè wa ba-Baptistes, mêmè ndi mmwanyisha bulelela. Udi ne meeji mapite ne bwongo butwe, ne—ne mmupwe mwoyi bintu byàbûngì kupita bîndi mêmè mufwanyine kumanya; bwalu yêyè n'Docteur en—en Divinité, kabidi mwikale ngangabuka, kabidi mwikale Docteur en Science. Mmuntu wa meeji matwe. Kadi udi wamba ne abi... Dîbà dyakamona bânà baa balume baa Nzambi ne bânà baa bakaji baa bantu bavwa balenga kwîsù; yêyè udi wangata mmwenenu wa Josèphe, kadi kwamba ne “baa—baakabwela mu mubidi wa buntu,” ne baakadyangacila bakaji. Ne kuvwa bantu baa mpolondo mu buloba bwa Nod. “Nenku baakadyangacila bakaji ne bàakasômba naabo, pavwa bânà baa balume baa Nzambi, Banjelo badishinde abu, bangate ne bamone bânà baa bakaji baa bantu; ne dijinga dya disangila dya mulume ne mukaji ke divwa cintu cya cinene menemene, nenku bu muvwabo benze mpekaatu ku didishinda, baakabwela mu mubidi wa buntu.”

¹³⁸ Bôbò benze nanku awu, badi banyangakaja dyondopa dya kudi Nzambi, badi banyangakaja bikwabo byônsò. Dyabulu yêyè mwa kufûka, udi mwomumwe ne Nzambi. Dyabulu kêna mwa kufûka to. Ndi muswe undeeje mwaba nansha umwe udi dyabulu mwa kufûka. Kêna mwa kufûka to. Yêyè utu anu ukudimika bidi bimana kufûka. Yêyè kî mmufûki to. Yêyè udi anu mukudimiki cyanaana.

¹³⁹ Ee, dîbà adi, cyakenzeka ncinyi? Tangilaayi. Wanyi ngumvwijilu nyêyè ewu. Dinungu didi dipangike ke dyôdi edi.

¹⁴⁰ Mpindyewu mbapete nsòkòmuntù, kadi kwêna mwa kwenza ne nsòkòmuntù asangile ne mukaji wa muntu bwa kulelabo mwâna nansha. Kwêna mwa kusambakaja muntu ne nyama to. Kabyakusambakana to. Kwêna mwa kudyelesha mashi a nyama to, nansha nyama kaayi.

¹⁴¹ Pâmvwà mu Afrike, bavwa benzela bantu bafiike abu maalu mabi be; muntu mukwabo kungambila, wamba ne: “Badi anu nyama yetu eyi menemene.”

¹⁴² Mêmè ne: “Mfwileku luse. Bôbò aba's mbantu anu mùdì wêwè amu, pâmwâpa bakupiteku ne wêwè.” Indilaayi nnwâmbilè, paudi ne lwidì lwa mushindu awu, wêwè ngudi munkaci mwa kwalukila ku nyama. Mêmè ne: “Muntu mwine awu, nansha yêyè mufiike fitutu bu ditoba difiike dya mu karta, anyi mwenze wa kalaabi bu diwoji, anyi nansha yêyè wa bleu bu indigo, mmufwanyine kusungila mwoyi webe pa kufila mashi a kukwelabo. Kadi kudidingi wadyelesha mashi a nyama to.” Ncyà bushuwa, mmuntu.

143 Kî mbwalu ne edi dikoba ndifiike, ne dikwabo difiikuluke, ne dikwabo dya kalaabi, ne dikwabo ditooke, aci kacyna ne cidici cyenzaku to. Bible mmwambe ne: “Ku mashi amwe Nzambi wakenza bantu bônso.” Ncya bushuwa menemene. Myaba ituvwa basombèle, ishintulula meekala etu, kabivwa ne bwalu mu byôbi abi to. Ku muntu umwe—umwe Nzambi wakenza bantu baa matunga ônsò, ku mashi amwe, matunga ônsò anu mwomumwe.

144 Ba-Chinois; muntu wa diikala kêna mwa kwamba mpindyewu, muntu mufiike kêna mwa kwamba mpindyewu, ne: “Muntu wa ba-Chinois wawa, yêyè—yêyè ngwa kalaabi, ncyakwikala nende bwalu.” Yêyè awu’s mmwaneenu. Ne wêwê mutooke kwêna mwa kwamba muntu wa kalaabi anyi muntu mufiike, anyi ewu wamba ewu ne: “Ncyêna neebe bwalu.” Mmwaneenu. Cya bushuwa menemene.

145 Monaayi, mpindyewu, cyakenzeka ncyôci eci. Mêmè ndi ngitabuuja, ne ndi mwa kucijaadika ne Bible, bwa ne nyoka awu ngwákacyenza. Nyoka awu ke muntu udi mupangike awu pankaci paa nsòkômuntù ne muntu. Bwalu, teejeaayi, monaayi bwalu ebu mpindyewu, ne nyoka kavwa nyama wa udikoka panshi to. Uvwa nyama wa “mudimuke” kutamba nyama yônso ya mu mpàta.

146 Mpindyewu, ndi muye mwangate mikanda ya mbumbilu wa myaku, leelu ewu, ya myaba yônso, bwa kukeba mwaku ewu, civwa mwaku ewu *mudimuke* uumvwija. Udi uumvwija ne “kwikala ne meeji matwe, kwikala mudimuke,” ne, dyandamuna dîmpè menemene mu—mu cyena Ebelu (dya m-a-h-a-h, mahah) didi dyumvwija ne “udi ne dimanya dilelela dya mêyi makulu a mu nsombelu.”

147 Mpindyewu twänjì tutangilaayi cyôci eci kakese. Yêyè udi ne meeji matwe, mudimuke, kadi mwikale ubiikidiibwa ne “nyoka.” Kadi, nwavulukaayi ne, yêyè ke uvwa cintu cya meeji matambe kutwa civwàku, ne mufwanangane ne muntu kutamba cintu cikwabo cyônso civwa mu mpàta; mutambe kwikala museemene pamwe ne muntu. Kavwa nyama wa udikoka panshi to. Mulawu awu ngwakamuvwija nyama wa udikoka panshi. Kabidi yêyè uvwa. . . Bible udi wamba ne yêyè nguvwa mutambe bulenga ku byônso.

148 Nansha mulawu mwine kawakamunyenga bulenga bwende bwônso to; nansha nanku’s meekala a butumbi a nyoka mmalenga a dikema, ne ngàsà wende ne budimu bwende abu. Nansha mulawu mwine kawakayumusha byônso to. Kadi, nudi bavuluke ne, Nzambi wakamwambila ne mikolo yende iwwa ne cya kuumumuka ne yêyè uvwa ne cya kwikala wendela pa difu dyende. Nenku kwêna mwa kusangana mu nyoka mufuba nansha umwe mufwanangane ne wa muntu to, nenku ke bwa cinyi maalu a mamanya mmakebe mapange. Kadi’s nyêyè awu.

149 Nzambi mmucisokoke beena meeji ne badimuke, ne wakalaya bwa kucisokolwela bânà baa Nzambi, mu matuku a ndekeelu mwikala bânà baa Nzambi ne cya kumweneshiibwa, mwikala, “bânà baa Nzambi baa bwena bavwa basanka ku difùkà dya dyulu ne buloba abu.” Piikala dibuulula dinene dya Bunzambi ne maalu makwabo nebituuludiibwe mu matuku a ndekeelu, Yêyè uvwa ne cya kumweneshila maalu aa kudi bânà baa Nzambi. Nudi bamanye ne ke cidi Mufundu ulongesha. Kadi’s ke twètù aba. Ke bwa cinyi Nzambi udi munkaci mwa kutukangwila maalu aa. Nzambi udi munkaci mwa kubweja bânà Bende mu dimweneshiibwa. Udi uya upita too ne pa mikalu ya dimanya dyônsò dya muntu, ukabwela too ne mu mabuulula a mu nyuma, kadi kuCituulula panshi. Katwena balongesheku, mu Bible ewu ne: “Apa mbwa ewu udi ne lungenyi” anyi? Kî mbyakalongaye mu seminere kampanda to; kadi bidiye mulonge ku binù byende kumpala kwa Nzambi, ne bidi Nzambi muumvwe disanka bwa kumupa. Bânà baa Nzambi, bamweneshiibwe!

150 Ke nyoka nyewu, mpindyewu ke civwa nyoka ncyeci; mêmè nênnupè dyanyi dizola mêmè.

151 Tudi ne . . . tudi bapweke kwinshi, ku ludimba, kuya too ne ku civuba aci, nenku kupweka kupweka, ne *cikampanda*, too ndekeelu wa byônsò ne panudi nukafika ku nsoko, ku nsòkòmuntù. Ne patudi tuumuka pa nsòkòmuntù, mpindyewu tutupika tuumuka pa nsòkòmuntù tukafika ne pa muntu, ke twètù kubanga kudikonka ne mbyenzeke nanku bwa cinyi.

152 “Ee,” mudi maalu a mamanya amba, “mpindyewu indila! Tudi mwa kusanga mukaji wa muntu ne nsoko ne nsòkòmuntù, ne pashiishe ewu ne ewu, muntu mulume ne nsòkòmuntù mukaji.” Kabyakukumbana to. Kucisambakaja ne nyama kana yônsò ewu; kabyakukumbana to. Mashi kaàkubwelakana to; angata mashi ebe wêwè, mmashi mashiilangane anu bikole, bikole menemene.

153 Kudi mashi kampanda a nkacinkaci mwaba ewu, kadi kabeena mwa kupeta nyama awu to. Kaa, Aleluuyah, nkaadi mbanga kuumvwa butendeleedi bumbwela mpindyewu ewu. Monaayi. Bwa cinyi? Nzambi mmubasokoke cintu aci. Kakwena mufuba mu nyoka mufwanangane ne mufuba wa muntu to. Mmuteeke cintu aci kule menemene mu mushindu wa kacyi mwa kusokolodiibwa kudi bantu baa meeji matwe abu to.

154 Nenku nênnùleejè kudi muntu wa meeji matwe awu mufumine, mwaba—mwaba udiye usanganyiibwa, twamb’eku twamb’eku. Nudi numona, yêyè kèna mwa kufumina ku aci to.

155 Cidi ne cya kulwa ku dibuulula: “Wêwè udi Kilisto, Mwânà wa . . .” “Pa lubwebwe elu Nêngibakilèpu Ekeleeziya Wanyi; ne biibi bya iferno kabyena mwa kumutamba bukole to,” dibuulula dya mu nyuma. Mmunyi—mmunyi mwakamanya Abele mwa

kulambula mwânà wa mukooko, pamutu paa Kaayina wâkalàmbula bimuma bya mu budimi? Cyakabuuludiibwa mu nyuma kudiye. Kwêna ucipetela mu ma-seminere to. Kwêna ucipetela ku mangumba to. Udi ucipetela ku Dyulu.

¹⁵⁶ Mpindyewu tangilaayi nyoka, nyoka uvwa ku cibangidilu ewu. Twênzàayi dizola dyende mpindyewu. Mmulumyana muleemule wa kafyondo. Udi pankaci paa nsòkòmuntù ne muntu. Nenku, nyoka awu; dyabulu, Lucifer, uvwa mumanye ne ke mashi amwepele avwa mwa kubwelakana ne mashi a muntu aa, muntu umwepele uvwaye mwa kukwata nende mudimu. Kavwa mwa kukwata mudimu ne nsòkòmuntù to, awu mashi kaàvwa mwa kubwelakana to. Kavwa mwa kukwata mudimu ne bikwabo bintu bishiileshiilangane ebi to. Kavwa mwa kwenza maalu ne mukooko to. Kavwa mwa kukwata mudimu ne kabalu to. Kavwa mwa kukwata mudimu ne nyama kana yònsò ewu to; bivwa anu bikengela bwa kukwataye mudimu ne nyoka ewu.

¹⁵⁷ Tumwangataayi mpindyewu tumone ne mmufwanangane ne cinyi. Yêyè mmulumyana muleemule wa kafyondo, muntu wa mpolondo wa kalekale ne kaleela ewu. Kwòkò aku ke kudibo bakasangana mifuba minene eyi, ne mêmè nênnùleejè cyôci aci mu Bible. Mpindyewu tangilaayi ne ntema yònsò. Eyo. Mulumyana muleemule wa kafyondo ewu, twânjàayi kwamba ne uvwa—uvwa bule bwa makàsà dikumi [mètres 3], ne makaaya manene maalabale; mufwanangane anu ne muntu menemene. Nenku mashi ende, paanyima paa yêyè mumane kupweka, basange nyama ne mukwabo; udi mwa kusanga nyama; nenku byakatungunuka kwenda kupeta mashi mabàndile, mushindu mubàndilè wa mwoyi, mushindu mubàndilè, too ne mudibi bikabanda mu cipidi cya muntu. Kadi ditwangana dya ndekeelu edi, dya nkacinkaci edi, dyakakoseka. Mbanganyi badi bamanye ne maalu a mamanya kaàcyèna mwa kupeta dinungu didi dipangike? Nwênù bònsò nudi bamanye aci. Bwa cinyi? S'ke yêyè ewu, nyoka awu. Ke yêyè uvwaku ewu, mulumyana muleemule wa kafyondo awu.

Nenku dyabulu udi upweka, mpindyewu, wamba ne: “Mêmè ndi mwa kufila disonsodiibwa.”

¹⁵⁸ Mpindyewu, wêwè mubange kwikala utangila bakaji ne mushindu wa dyanza wa bakaji, uvuluke ne, udi mulaaba kudi dyabulu (bwalu mwine awu kî mmukajeebe wêwè to).

¹⁵⁹ Monaayi, mpindyewu, dyabulu ngwâkatùuluka kadi kubwela mu nyoka. Nenku kupetaye Eva mu budimi bwa Edena, butaka, ke kwasaye bwalu bwa cimuma civwa munkaci mwa budimi. *Munkaci* mbwena kwamba ne “pankaci,” ne bikwabo; nudi bumvwe's, mu disangisha dya bantu basambakane. Ke yêyè ne: “Mpindyewu, cidì cyenza disanka. Ncilenga ku mèsù.” Cyakenzaye ncinyi? Wakabanga kwambisha Eva, nenku kushaalaye nende, bu bayende.

160 Ke kumonaye ne civwa cyenza disanka, ke kuya kambilaye bayende, kadi ukaavwa mumane kwikala ne difu, dya Sataana.

161 Ke kulelaye mwanende wa balume wa kumpala, dyende dîna Kaayina, mwâna wa Sataana.

“Mpindyewu,” mûdi wêwè wamba, “aci ncyà mafi.”

162 Eyo, netujandule nî ncyà mafi anyi kî ncyà mafi. “Nenku nênteeke lukuna pankaci paa Dimiinu dyebe ne dimiinu dya nyoka.” Cinyi? Dimiinu dya nyoka! Mukaji uvwa ne Dimiinu, ne nyoka uvwa pende ne dimiinu. “Ne Yêyè neakuzaaze mutù, ne wêwè neuMuzaaze cikankanya.” Nenku *dizaaza*, mwaba awu, mbwena kwamba ne “kwenza Difuta dya cibawu.” Mpindyewu’s ke “dimiinu” dyenu dya nyoka ndyôdi adi.

Mpindyewu, monaayi, ke bantu babidi aba bapatuka aba.

163 Mpindyewu, nyoka ewu, paakimanaye mwaba awu, mulumyana mulemule wa kafyondo ewu mwimane mwaba awu, wakapeta dipiila dya kwenda kwa masandi ne mukaji wa Adama. Mpekaatu udi usanganyiibwa penyî leelu ewu? Cidi cyenza ne maalu ikale mushindu udiwu leelu ewu ewu ncinyi? Mpindyewu, mêmè—mêmè. . . Ncyà bushuwa ne nudi mwa kuumvwa cîndî munkaci mwa kwamba eci. Ke cyôci civwaku aci.

Nenku paakenzaye nanku, Nzambi kwamba, kubanga kubiikila Eva ne Adama.

Ke ewu kwamba ne: “Mvwa butaka.”

Ke Yêyè ne: “Wâkwambidî ne udi butaka nganyi?”

164 Ke kubangabo, mushindu utubi mu cilwilu cya basalaayi amu, batupwilanga cilumbu. Yêyè ne: “Ee, mukaji ûdî Wêwè mumpe, ke wenji ewu. Yêyè ngudi mufike ku dintwisha.”

165 Ke mukaji ne: “Nyoka ngudi mumpe cimuma cya pomme?” Eyo, muyiishi, pinganaku mu wêwè’s.

166 Wakamba ne: “Nyoka ngudi mungambishe.” Nudi bamanye cidi *kwambisha* kuumvwija? “Mukooyisha.” Bu mukaavwaye amu. Dyabulu kaakamupaku cimuma cya pomme to. “Nyoka ngudi mungambishe.”

Ke pasiishe mulawu kulwawu.

167 Yêyè ne: “Bwalu udi muteeleje nyoka pamutu paa kuteeleja bayeebe, wêwè wâmanyî kuumushi Mwoyi pa buloba. Nenku neu—neuvudije ntatu yebe; ne diimita dyebe nediikale kudi bayeebe,” ne bikwabo.

168 “Nenku wêwè bwalu udi muteeleje mukajeebe, pamutu paa kunteeleja Mêmè (Ndi mukwangate ku lupwishi; mushindu udi mutambe kwikala wa kuulu awu), ku lupwishi nkûdi upingana.”

169 “Nenku, wêwè nyoka, bwalu udi mwenze nanku, mikolo yebe idi ijimina. Pa difu dyebe mpawendela, matuku ebe ônsò a mwoyi. Ne neukinyiibwe. Ne lupwishi ke ciikala cyebe

cyakudya.” Ke bwalu mbwabu. Ke dinungu didi dipangike ndyôdi adi.

¹⁷⁰ Mpindyewu ke Kaayina ulwalwa ewu. Tutangilaayi ngiikadilu ayi. Ke Kaayina ulwalwa ewu. Yêyè udi cinyi? Mmwena kantu-ku-byanza wa budimu. Udi udima madimi. Wa meeji matwe, wa lumvu lukole; mutendeleedi, mutendeleedi wa dikema; tangilaayi byende—tangilaayi byende byambiibwa mpindyewu. Anji tentemukaayi pamwe naanyi bwa tusunsa tukese cyanaana.

¹⁷¹ Ke yêyè ulwalwa ewu. Mmudimanye mudiye ne maalu mîmpè a mu nsòmbelu. Mmunange kwikala kuya mu ekeleeziya. Udi udiibakila ekeleeziya, udikebela mulambu. Utwala cyoshelu, ne byônso abi. Wibaka cyoshelu, utekapu bilongo. Uteeka budimi. . . bimuma bya mu budimi, ubilambula Nzambi. Yêyè ne: “Ke Wêwè awu, Mukalenge. Ndi mumanye ne tuvwa badye bimuma bya pommes, ke cyakabunda cilumbu.” Bamwe ba ku ndelenganyi yende badi ne mmwenenu wa mushindu umweumwe awu. Bileeja kudici cifume. Kutwalaye bimuma byende bya pommes abi, bipoola mu budimi, kubiteekaye mwaba awu, kwamba ne: “Eci necifute cibawu.”

Nzambi ne: “Kacivwa bimuma bya pommes to.”

¹⁷² Kadi, ku dibuulula dya mu nyuma, Abele kumanyaye yêyè ne civwa mmashi. Ke kulwaye ne mwânà wa mukooko, kumukosaye muminu, kufwaye.

¹⁷³ Ke Nzambi kwamba ne: “Aci ke cya bushuwa. Ke cidi cyenze bwalu abu. Civwa mmashi’s.” Nudi bamanye mashi ândi ngamba. Eyo. “Mashi ke akenza bwalu abu.”

¹⁷⁴ Tangilaayi mpindyewu. Ke pashiishe paakamona Kaayina ne mwanaabo munsantu mubunguluki wa mu malaba awu wakiitabuujiibwa kudi Nzambi, ne bimanyinu ne maalu a kukema bikaavwa byenzeka kuntwaku, kumuumwilaye mukawu. Yêyè ne: “Netwimanyike cintakanyi eci anu mpindyewu ewu.” Tangilaaayi numone bânà baabo baa balume, tangilaayi numone bânà bende, leelu ewu. “Mpindyewu, mêmè’s ngutu ne meeji matwe kumupita yêyè,” ke kupetaye cijji. *Cijji* cyakafuma penyi? Nudi bafwanyine kwamba ne cijji. . . ? Yêyè kushipa mwanaabo. Uvwa mushipyanganyi.

¹⁷⁵ Nudi bafwanyine kubiikila Nzambi ne mmushipyanganyi anyi? Adama pende nyawu uvwa mwânà wa Nzambi. Bible ngudi mwambe ewu, ne: “Adama uvwa mwânà wa Nzambi,” mbangilu mukezuke awu kuntu kwaka. Adam uvwa mwânà wa Nzambi. Nenku mukawu awu ne lukuka alu, ne byônso abi, kabivwaku mwa kupatukila mu musulu mukezuke awu to.

¹⁷⁶ Bivwa ne cya kufumina mu mûngà mwaba. [Citupa cya mukaba munda mutupu—Muf.] Nenku byakafumina kudi Sataana, uvwa mwikale mushipyanganyi, anu ku cibangidilu. Bible mmwambe ne: “Yêyè uvwa mwena mashimi

ne mushipyanganyi, anu ku cibangidilu.” Ke bwalu mbwabu. Ne yêyê wakashipa mwanaabo.

¹⁷⁷ Nenuki civwa nciimfwanyi cya lufu lwa Kilisto. Pashiishe, mu cyôci aci, mu bushuwa bwa bwalu, Yêyê kujuula Sete bwa kwangataye kaaba kende. Lufu, dijiikiibwa, ne dibiika dya ku lufu bya Kilisto.

¹⁷⁸ Nenuki tangilaayi, pashiishe, ke bantu beenu baa mpolondo balwalwa aba. Pashiishe Kaayina kuyaye ku buloba bwa Nod. Piikalabi ne tatwëndè uvwa muntu wa mpolondo muleemule wa kafyondo, Kaayina uvwa mufwanyine kwikala mufwanangane ne cinyi? S’ne tatwëndè. Kuyaye ku buloba bwa Nod, kadi yêyê kwangata umwe wa ku bânà baabo baa bakaji.

¹⁷⁹ Mushindu umwepele uvwaye mwa kwenza. Kakwena bakwabo bakaji badi bafwanyine kulwa to, anu balwile kudi Eva. Badi bamba ne baakalela bânà baa balume ne baa bakaji makumi mwandamutekete. Bu ne kakuvwa mukaji to. . . Bible kênâ ubala bakaji padibo balediibwa to, anu balume. Nenuki piine apu, bu ne kakuvwa mukaji mukwabo pa kuumusha Eva, paakafwaye, bukwâpânu bwakiimana’s. Uvwa ne cya kwikala mulele bânà baa bakaji. Nenuki uvwa ne cya kusela mwanaabo wa bakaji menemene.

¹⁸⁰ Yêyê kuya ku buloba bwa Nods e kwangataye—e kwangataye mukaji. Nenuki paakamuselaye kwine aku, kwôkò aku ke kwakapetabo bantu banene baa mpolondo abu, bavwa biikale bânà baa Nzambi badishinde; baakafumina ku tatwâbò awu, dyabulu, kupicila kudi Kaayina. Ke dinungu dyenu didi dipangike adi.

¹⁸¹ Nenuki tangilaayi dimiinu dya nyoka. Mpindyewu tangilaayi. Vulukaayi ne, dimiinu dya nyoka ditu ditendeleedi. Tangilaayi mudidi dibanga kutentemuka mpindyewu, bwa tusunsa tukese. Ke dyôdi diyaaya edi, dimiinu dya nyoka. Cyakabenzekela ncinyi? Mpindyewu ndekelaayi mbale cintu kampanda mwaba ewu, mbîndi mufunde mu mapingaja emu.

¹⁸² Cidi cilwile mu ndelanganyi ya Abele ncinyi? Telejaayi eci. Eyo. Paanyima kulwaku Abele. Paanyima paa Abele kulwaku Sete. Paanyima paa Sete kulwaku Noa. Paanyima paa Noa kulwaku Sem. Paanyima paa Sem kulwaku Abraham. Paanyima paa Abraham kulwaku Izaka. Paanyima paa Izaka kulwaku Yakobo. Paanyima paa Yakobo kulwaku Yuda. Paanyima paa Yuda kulwaku Davidi. Paanyima paa Davidi kulwaku Kilisto, too ne ku bupwangane.

¹⁸³ Tangilaayi kale wawa mushindu uvwa Nyuma wa Nzambi musòmbèle munda mwa Abele. Tangilaayi mwâkasòmbelâYe munda mwa Sete. Tangilaayi mwâkasòmbelâYe munda mwa Yuda. Tangilaayi mwâkasòmbelâYe munda mwa Davidi. Tangilaayi Nyuma umweumwe awu muvwaye ubiikila, munda

mwa dimiinu dyakane adi, too ne kundekeelu. Civwabo benze nansha ciikale cinyi, bavwa badyanjila kulongolola.

¹⁸⁴ Tangilaayi Yakobo, mukooyike... Ncyèna ngamba eci bu dinyangakaja dya cijila to. Kadi Yakobo, kenji kaa maalu makonyangale aku, kacya anu kaalembelala dîbà dyônsò kwinshi kwa mapupila a mamwàku dîbà dyônsò; kiikale kanyeemakana eku ne eku, kaacilumaacikaji. Kuvwalaye bintu pambidi, kuya kadinga tatwëndè, bwa kupetaye dibenesha; kadi dikaavwa dimana kumupa anu kwônsò aku kumpala kwa difùkà dya dyulu ne buloba. Cya bushuwa, ke mudibi.

¹⁸⁵ Kupatuka kuya kwaka kadi kudinga tatwëndè-mwenu; kwangataye tuumici twa makejimakeji, tuumici twa cilombalomba, kutwasaye mu mâyi, bwa kuciinyisha ngombe ayi pavwayi yimita mafu; bwa kuyifikisha ku dilela twânà twa makejimakeji, bwa wamona mwa kwibila ne kwangata ngombe ayi. Nzambi wakamubenesha mu ciine aci. Ncyà bushuwa.

¹⁸⁶ Mulawu wikale kudi ewu yônsò wadidinga kwamba cintu kampanda bwa Yakobo. Nudi bamanye—nudi bamanye civwa muprofeta wa mashimi awu mwambe... Anyi, uvwa wenza ciprofeta anu cya bushuwa eci. Baalama, kwambaye ne: “Ewu yônsò wâmubènesha neabeneshiibwe, ne ewu yônsò wâmwela mulawu neediibwè mulawu.”

¹⁸⁷ “Ntu munwângate, Yakobo. Ndi mumusangane bu... bu mu buloba bwenyi. Ne anu mudi mukanku usanguluja twânà twawu, ngâkamusanguluja e kumupatula.” Aleluuyah! “Kakuyi ku bukole to, kakuyi ku makanda to, kadi ku Nyuma Wanyi, mudi Mukalenge wamba.”

¹⁸⁸ Tangilaayi mudi cyôcì aci cipweke cyenda ciya too ne ku bupwangane abu. Nyuma awu mmwenze mudimu wenda upweka too ne ku bupwangane mu Kilisto, mupweke wenda upicila mu yônsò wa ku Bankambwa, mwikale anu upweka. Civwabo benze nansha ciikale cinyi, civwabo bambe, kakuyi mpatà to bavwa dimiinu dya mwakane.

¹⁸⁹ Nenku, apa, pavwa mwakane Abraham... Butumbi's we! Kaa, kadi ngaavu kudyumvwa bilenga be. Mwakane Abraham paakatuutakeenaye ne Melekisedeke, Yèyè uvwa Nzambi Yèyè mwine!

¹⁹⁰ Melekisedeke uvwa nganyi? “Mfumu wa Salema, udi Mfumu wa Yelusalema, Mfumu wa ditalala. Kayi taatu. Kayi maamu. Kayiku ne ntwadijilu wa matuku, anyi ndekeelu wa mwoyi.” Nansha Yèyè mwikale Nganyi, Yèyè ucidi anu ne mwoyi. “Kacya kayiku mulediibwe. Kaadyakufwaku to. Kacya kayiku ne taatu anyi ne maamu. Kacya kayiku ne ntwadijilu wa matuku, anyi ndekeelu wa mwoyi.” Ngambilaayi ne uvwa Nganyi. Nzambi wa Cyendeleele; mu citudi twètù tubiikila ne... .

¹⁹¹ Kaa, nyewu ngâpù mwoyi mpindyewu munutu mene nucibiikila's. Tèòfàni, ke cyôcì aci. Anu bu mudi... Kî mbwalu

bukwatakaja to; kadi paaci's cidi anu cintu kampanda cimweneshiibwe. Mushindu wakalwaYe kwa Abraham mu ntenta kuntu kwaka, bu mwanjelo, e kwamba ciprofeta, kwambila Sarah mwakasekaye, paanyima Pende, ne bikwabo. Cintu aci, cintu cimwecimwe aci.

¹⁹² Nenku's ke Yèyè ewu uwaku awu. KutuutakeenaYe ne Melekisedeke. Nenku kakwèn-... Abraham tatwëndè wa kakwëndè, mu dimiinu dya mwakane, kufutaye byadiikumi kudi Melekisedeke; nenku cyôci aci cyakabadiibwa bwa mwâna wa mwâna wa mwikulwende, dimiinu dya mwakane.

¹⁹³ Mpindyewu ke dimiinu dya—dya nyoka dilwalwa edi. Mpindyewu, vulukaayi ne, nekwikale lukuna, mvita pankaci paabo.

¹⁹⁴ Dimiinu dya nyoka padidi difika, nenku didi dipatula cinyi? Mpindyewu twangataayi ndambu wa bidimu bya ntwadijilu. Mpindyewu tangilaayi cidi cyenzeka kwôkò aku. Netucibale too ne kwinsi, bwalu ndi mfuma ku dicikenketa. Dimiinu dya nyoka dyakapatula Kaayina. Kaayina kuya ku buloba bwa Nod, kupatula bantu baa mpolondo, ke kulwabo mu buloba bwa Noa.

¹⁹⁵ Bavwa ne meeji matwe, balonge tulaasa, bantu baa luumvu lutwe. Ncya bushuwa anyi? Bavwa biibaki, bajandudi baa bintu bipyabipya, beena maalu a mamanya; pa kuumusha baa ku dimiinu dya mwakane to, kadi baa ku dimiinu dya Sataana, nyoka. Bavwa bantu baa bu mudi—bu mudi beena maalu a mamanya, ne biibaki, ne bantu banene, balongeshanganyi. Ke mudi Mufundu wamba. Bavwa batuuta cyamu cya kabanda. Bavwa batuuta cyamu cifiike. Bavwa batuuta byamu. Bavwa bajandula bintu bipyabipya. Bavwa bakolesha byamu bya mishindu mishiileshiilangane, biibaka nzubu, ne bikwabo. Ke mudi Mufundu wamba. Ne bavwa baseki baa Dimiinu dya mukaji, Noa, mwakane. Ncya bushuwa anyi? [Disangisha didi dyamba ne: "Amen."—Muf.]

¹⁹⁶ Twãnjàayi kubalonda ntanta tũng. Pashiishe, tudi tubapeta ku bwâtù, kwakabutudiibwa bintu byônsò aku. Bakaavwa babwele mu mushiki wa mpekaatu webe wa eyo, ne bôbò ke bakaavwa bangate bukookeshi, ne meeji matambe kutwa ne luumvu lutwe. Too, ne paalu Nzambi kutapa disù pa buloba, kakucivwa kushaale bantu bàâbũngì menemene to, ke kwangataYe anu Noa ne famiye wende mu bwâtù, kulokesha mvula ne kubutula cintu cyônsò nkòong. Ukaavwa mumane kwambula Enoka, kumpala kwa dîbà. Ncya bushuwa anyi? [Disangisha didi dyamba ne: "Amen."—Muf.] Muvwa dimiinu dyônsò, dimiinu pamwe ne dyônsò; kadi bivwa bikengela kiipacila Kende kakumbane.

¹⁹⁷ Mpindyewu, Noa ne bânà bende baa balume, baa bwena baakapatuka abu, Ham, Sem, ne Yafete, baakapatuka mu ndelanganyi mwakane abu.

¹⁹⁸ Mmunyi mwakapita dimiinu adi dyamwamwa? Dimiinu adi dyakabwela mu bwâtù, anu mwakabweladi ku cibangidilu amu, dibwelele kudi mukaji, bakaji baabo abu. Bôbò ke baakatwala dimiinu dya Sataana, kupiciladi mu bwâtù, anu mwakambula Eva dimiinu dya Sataana, bwa kulelaye Kaayina, dipicila kudi mukaji.

¹⁹⁹ Nwênu nudi nupicisha bakaji biine abu mu byambilu byenu bu bayiishi, pende Bible mwikale upiisha cintu aci! Pôlò wakamba ne: “Muntu yêyè udyambidila ne mmuprofeta, anyi nansha mene ne ngwa nyuma, amanye ne bindi mêmè mfunda ebi mmêyi matuma a Mukalenge; kadi yêyè muswe kwikala mupangi, ashaale mene anu mupangi nanku.”

²⁰⁰ Ke cyakenza ne mêmè mpatuke mu ekeleeziya wa ba-Baptistes lwa kwinsi eku. Mwaneetu Fleeman uvwa mwaba ewu kukaadi mutanci; ngela meeji ne yêyè uvwapu diloolo diine adi. Docteur Davis wakamba ne: “Wêwè ke wîkala mwa kwimana mwaba ewu bwa kujidila bakaji abu bu bayiishi.”

Mêmè ngâkamba ne: “Ncyakucyenzaku to. To, nansha bya kumona lufu.”

Yêyè ne: “Ee, kadi’s nênkwpâtè.”

²⁰¹ Mêmè ne: “Batu bakaadi bangipate mu myaba mitambe ewu.” Mêmè ne: “Dîyi dya Nzambi ndyôdi edi, Didi dipiisha cintu aci. Nenu mêmè ncyêna mwa kutwa nyama ku mikolo cidi Nzambi upiisha nansha.” To, mukalenge.

²⁰² Bônsò badi bacyenza abu, bidi bileeja ne mbalongeshi baa mashimi, baprofeta baa mashimi. Bible mmwambe ne cyôci aci ke ciikalabo. “Nebaseswishe ne basungula mene bu ne bivwa mwa kwenzeka.” Ke bawu mbwabu.

²⁰³ Monaayi eci mpindyewu. Nenu mwômò amu, cikondo aci, mwakapatuka Ham, Ham ne mukajende, ne bakwabo. Yêyè mulawu wakamulandala. Kudi Ham kwakalwa Nimrod, wâkiibaka Baabulona awu. Mu Baabulona mmwakapatukila ekeleeziya wa Katolike, mbangilu wende. Kulwabi too ne ku Aakaba, kuumukilabi ku Aakaba, kubwelabi mu Yudaasa Mpongoloki; bibànda too, ne mu mufwilakanyi ne Kilisto.

²⁰⁴ Nenu mu matuku a ndekeelu aa, nyuma wa mufwilakanyi ne Kilisto ne Nyuma wa Kilisto nyôyi eyi. Nyuma wa mufwilakanyi ne Kilisto, wamba ne: “Matuku a bishima akaadi mamane kupita.” Nyuma wa Kilisto, wamba ne: “Yêyè udi umweumwe awu makeelela, leelu, too ne kashidi.” Nyuma wa mufwilakanyi ne Kilisto udi wamba ne: “Kabyena ne dishiilangana to nansha wêwè mubatijijibwe mu ‘Taatu, Mwânà, Nyuma Mwîmpè,’ bakupongolwele mâyi pa mutù, bakumyamine, anyi nî ncinyi cyônsò, bidi byumvwija anu cintu cimwecimwe aci.” Bible mmwambe ne Nzambi kêna mwa kupangila, ne Yêyè kêna mwa kushintuluka to. Uwakwacila mudimu ke nganyi? Abu budi anu mbwebe.

205 Mpindyewu udi wamba ne: “Badi mwa kusòmba pamwe anyi? Nyawu wambi, ne, mu bwâtù amu, Mwaneetu Branham, nuvwa ne bônso babidi Ham ne Sete.” Ncya bushuwa, ncya bushuwa menemene. Ham uvwa mubi. Sete uvwa mutendeleedi ne mwakane. Eyo.

206 Twänjäayi kulonda Ham. Eyo, mpindyewu, kudi Ham ne Sete mu bwâtù bumwe; umwe mwakane, ne mukwabo mubi. Kuvwa cikololo ne nkuci mu bwâtù bumwebumwe abu. Kuvwa Yudaasa ne Yesu mu ekeleeziya umwe. Kuvwa mufwilakanyi ne Kilisto ne Nyuma Mwîmpè mu ekeleeziya umwe.

207 Nunku, leelu ewu, nyuma imweimwe ayi idi ikwata mudimu. “Biikale ne cimwenekelu cya difwana dya Nzambi, batendeleedi baa dikema, kadi biikale ne cimwenekelu cya difwana dya Nzambi kadi babenga kwitaba Bukole bwadi; kudi baa naku umuka.” Nyuma Mwîmpè, wamba ne: “Yesu Kilisto udi umweumwe awu makeelela, leelu, too ne kashidi.” Luseke luwasungula ke lwèpi?

208 Mufwilakanyi ne Kilisto udi wamba ne *Ewu* mmukanda wa twitabaayi cyanaana. “Twêtù netwikale twambulula anu Twitabaayi wa Bapostolo.” Ndi ngela muyiishi yônso naka kadyombo bwa kundeejaye mwaba udi Twitabaayi wa Bapostolo usanganyiibwa mu Bible ne: “Ndi ngitaba Mvidi Mukulu, Taatu wa Ngulu yônso, Mufûki wa dyulu ne buloba; Yesu Kristo, Mwanende. Ndi ngitaba Ekeleeziya Munsantu wa Katolike wa Roma, bwobumwe bwa bansantu.” Ciine aci nudi nucipeta penyi mu Bible? Kadi nansha nanku nutu anu numwambulula mu ekeleeziya yenu minene ya ba-Méthodistes ne ba-Baptistes ayi. Ndilongesha dya dyabulu, ne baprofeta baa mashimi mbadi badilongesha abu.

209 Nunku ndi ntekemena ne ncyêna nnutapa ku mwoyi to, kadi ndi munkaci mwa kucipoopela musonso bwa tabernacle ewu. Nwênù mwaba ewu mu Branham Tabernacle, nudikande ku bintakanyi bya mushindu awu abi. Cintu cyônso cidi ciitabuuja mu bwobumwe bwa bansantu aci ndubuku lwa mùzàngù. “Kudi mutwangaji umwepele pankaci paa Nzambi ne bantu, ne mwine awu m’Muntu Yesu Kilisto.” Nansha kwòkò kwikale ba-Mariya bûngi munyi!

210 Nudi numona mwakenza dimiinu dya mukaji adi kwaka anyi? Nudi numona mwakangaciibwa dimiinu dya mukaji adi kupitadi luseke lukwabo anyi?

211 Tangilaayi leelu ewu, mu Amerike. Amerike ndimiinu dya dyabulu. Ncinyi? Nditunga dya mwânà mukaji. Nukaadi bumvwe ne: “Ebu mbuloba bwa mwânà mukaji.” Ncya bushuwa. Nditunga dya mwânà mukaji. Bòbò mbadi bafila cikemu.

212 Mwva muye kuntweku, anu abidi adi panshi aa, mu Suisse. Bakaji biikale bamba ne...Mukaji mutekete mùle tente ne

Nyuma Mwîmpè kwambaye ne: “Udi mumanye, mêmè muye mu Amerike amu, badi bamba ne bakaji badi ne budishikaminyi.”

²¹³ Mêmè ne: “Imana nkwambile kudi ciine aci cikafikisha.” Ke mêmè kubanga kumulondela.

Yèyè ne: “Kaa, luse we. Ncyèna muswe bya nanku to.”

Mêmè ne: “Ke kudici cikafikisha aku.”

Nudi bamanye, bôbò kabeena benza maalu kuntwaku mudibo benza muneemu emu to.

²¹⁴ Ncinyi ciine aci? Imanaayi nnuleeje ne Amerike mmukaji. Pa binjanja byetu bya mfranga padi cimfwanyi cya muntu mukaji. Cintu cyônsò muneemu emu cidid anu mukaji.

²¹⁵ Ngambilaayi tûng, kakwena binwinu bya maala a kapyà bûngî bukumbane mu ditunga, bidi bifwanyine kwikala ne . . . Nudi nuteeka binwinu bya maala a kapyà makumi anaayi mu cimenga eci, kadi kuteeka ndumba isatu, bakaji balenga kwîsû batu benda bajeekeja nyima mu mùsèsèsù abu; nebatume misuuka mipite bûngî mu iferno, biikala mwa kubaalakana abu, kupita binwinu bya maala a kapyà byônsò binudi bafwanyine kuteeka mu cimenga abi. Ncyà bushuwa menemene.

²¹⁶ Nganyi mwine awu? Mmukaji. Yèyè udi cinyi? Yèyè ke udi nzambi wa Amerike.

²¹⁷ Angata bamwe baa ku banàyî ba ku télévision aba; badi bajuuka mwaba ewu babwela mu mabaka misangu inaayi anyi itaanu, biikale basômbe ne balume basatu anyi banaayi bashiilangane musangu umwe; ne bimwe bya ku bikandakanda ebi bibaleeja ne byamba maalu abo, babakwata fôtô butaka pambelu apa. Nenu nwênù nsongakaji mitekete nujuuka peenu nwangata ciine aci bu cileejilu cyenu, (bwa cinyi?) bwa mamwèbè ukààvwa mukudyanjidile, anyi kakwèbè mukaji ukààvwa mukudyanjidile awu. Nudi numona mwaba udi dimiinu dya nyoka adi dikwata mudimu anyi? Ncyà bushuwa, ndyôdi.

²¹⁸ Nenu ndyenze cinyi? Piikalabi ne bubi bavwa ne cya kubunyooka too ne ku nkongo dikumi ne inaayi, cikondo cya mikenji ya Môsà, bubi nebwikale bishi bu bwôbò mwa kunyookiibwa mu dituku edi, mudi dimiinu dya mwakane dikaadi bu dishepekete emu? Ne Nzambi wakamba ne nekulwe cikondo, Yèyè kayi mwipidije mudimu to, kî nkufwanyine kushaala nansha dimwe to. Tudi ku cikondo cya kunshiikidilu. Ndaayi nwenda nukebangana ne baakane diloolo edi; ndaayi eku ne eku mu bimenga!

²¹⁹ Kaa, udi usangana bidimba bya ekeleeziya biikale ne lulamatu lwa dikema kudi ba-Baptistes ne ba-Presbytériens, ne bikwabo, ne mwabo mwônsò. Kadi kabeena bwalu ne Nzambi to anu mudi kalulu kakayi bwalu ne divwala bisabaata bya nêjè. Kabayi bamanye kantu nansha kamwe pa Cyôci aci to! Cyônsò cidibo bamanye . . .

“Udi mwena Kilisto anyi?”

“Mêmè ntu Katolike.”

“Udi mwena Kilisto anyi?”

“Mêmè ntu Baptiste.”

“Udi mwena Kilisto anyi?”

“Mêmè ntu Presbytérien.”

“Udi mwena Kilisto anyi?”

“Mêmè ntu mwena Mpenta.” Aci kacyena ne dipetangana nansha dikese ne Cyôci aci to.

²²⁰ Udi mwena Kilisto bwalu Nzambi, ku ngâsà Wende, udi ukusungila. Nenku udi mumanye bidi bitangila Cyôci aci. Ne cintu kampanda ncishintulule nsòmbelu webe, byenza ne ukaadi usòmba nsòmbelu mushiilangane. Ne ukaadi muntu mupyamupya ne cifükübwa cipyacipya mu Kilisto Yesu. Ncya bushuwa.

²²¹ Kadi nudi numona kudi dimiinu dya nyoka anyi? Dimiinu dya nyoka civwa ncinyi? Masandi. Nudi nulonda anyi? Masandi ne Eva. Cyakenzeka ncinyi ku ciine aci? Cyakatwala cyôci aci ncinyi? Cikaadi cinyi diloolo edi?

²²² Tangilaayi paanyima paapa, kukaadi bidimu, paakapatuka musambu wa kumpala. Nwênù bakulumpe, pavwa... Bavwa ne cilele cya kwanji kukenketa misambu kumpala kwa kuyilekelabo bayimba ku bisanji. Kadi musambu wa kumpala wakapatuka, uvwa: “Binyungululaayi, nwênù tukajaana, binyungululaayi, nuleeje binù byenu bilenga abi,” ne byònsò mushindu awu. “Sekaayi taawu ne maawu, nùbènzè bònsò ne ‘ha-ha-ha!’” Ke wa kumpala ngwawu wakapicishabo. Nudi nwela meeji ne mulumyana mwine wâkafùnda musambu awu udi penyi? S’ukaadi mufwe.

²²³ Nudi nwela meeji bishi bwa Clara Bow, wâkapâtuka wa kumpala e kwakula pa, *Ditùntamana dyà Njìwù*, ne muji wa maja wa uvuula ne bilàmbà wa bwena wâkatùma binunu ne binunu bya misuuka mu iferno awu? Nudi nwela meeji ne udi penyi diloolo edi? S’ukaadi mufwe kukaadi ntanta mule. Udi penyi mwine awu, ne mubidi mwine wende awu? Mulaale muntu mwamwa, ke kuwutukunyabo mênù eku mu lupwishi amu, misanda ne bikusu ke kuwudyabi eku bibwela bipatuka. Ne musuuka wende udi usanganyibwa dyamwamwa kumpala kwa Nzambi mwakane.

²²⁴ Muntu mwine wâkangata mukaji awu e kwenzaye bilàmbà bibi kumona bidibo bavwala abi awu udi penyi, bwa kubasaka bònsò bapatuka baya eku ne eku, kabiyi bibākànyîne to? Bamba ne: “Cidibo bafwanyine kwenzela biine ebi ncinyi? Cinudi nuvwadila biine bintu bya mushindu awu ncinyi?” Cinudi

nukeba's mbwa balume biikale banutangila, bwalu kakwena mungà mushindu wa kujaadika aci to.

225 Kabidi udi mumanye ne paudi wenza ciine aci apu, ne kangènzàmpèkààtù kakwabo kakutangila, udi mumanye cidi cyenzeke? Ku Cibasa cya Cilumbulwidi... Udi wamba ne: "Mwaneetu Branham, mêmè ndi ne lulamatu kudi bayaanyi ne mwanyi mwônsò." Neubadiibwe mupiile bu mwende masandi. Yesu wakamba ne: "Ewu yônsò watangila mukaji bwa kumwalakana wamanyi kwenda nende masandi mu mwoyi wende." Piikala mulume awu ne cya kulumbulula bwa dyenda dya masandi, wîkala mumwendeshewu nganyi? Mushindu úvwà muvwale ne úvwà muditwale awu.

226 Mpindyewu, ncyèna njinga kwamba ne wikale uvwala bu cintu cikwabo cya mu bikondo bya kalekale to. Kadi, s'udi mwa kwikalaku ne mmwenekelu wa inăbânzà menemene.

227 Nenu upatuka apa uvuula bilàmbà, muvwale kaputulu keebe kakese kîpi aku, mudinyinge ne kakaba kaa cilàmbà mushindu ewu, ne kânà keebe kaa mu diboko ne twîsù bu kakopo kaa kutuutwilamu butu bwa mfwanka, wèwè ne mucu wa mfwanka ku mishiku, wenda upweka ne mùsèèsù. Kwèna ucyenza mu kiipacila kîmpè to. Udi mufwanyine kwikala kuyi mupiile ku bwalu abu to, kadi dyabulu yèyè udi ukwata neebe mudimu bu cyamu cyende cya mudimu anu mwakenzaye ne Eva.

228 Nditunga dya mukaji bwa cinyi? Bwalu diyaaya ditangile buludi ku dikookeshiibwa kudi bwena Katolike. Cidi cinyi leelu ewu? Kanwena nubumvwa bateelaku Yesu to. "Mwoyi Mariya! Mariya, maamu wa Mvidi Mukulu! Cecilia Munsantu!" Bansantu baa mishindu yônsò, bansantu bafwe. Kî nkwanji kwenza ntanta to, mwamwa mu... .

229 Mvwa mwamwa mu Mexico, cidimu cishaale eci. Ke mukaji mukwabo mukwate ne bya luse ulwalwa ewu, wenda ukalaba panshi. Binù byende, bipuluke byônsò mushindu awu, ne dikoba; udila mwadi, muvunge byanza. Ne tatwëndè wenda uya nende, mwambule twânà tukese tubidi, twikale tudila; mamwâbò ukenga bikole be; ciine aci bwa mukaji kampanda, udibo babiikila ne mmunsantu, mufwe. Bavwa biimanyike lupingu lwende pa kakuna. Munanga wende mulume kampanda nguvwa mumushipe. Nenu padibo anu bamushipa mushindu awu, mu bushuwa bwa bwalu, wënji munsantu; uvwa mwena Katolike. Pa nanku uvwa uya, bwa kuleeja didikengesha; nenu bivwa bikengela akalabe ntanta wa miles ibidi [kilomeeta 3,20], ukalabila pa mabwe malamika panshi, bwa kuleeja didikengesha.

230 Mwaneetu, piikalaku ne kudi cintu nansha cimwepele cidi cikengela mêmè kwenza, Yesu Kilisto wakafwa cyanaana. Ku ngâsà, ke kùndi musungidiibwe; kî mmu—mu mêmè mwine to, kadi ku diswa dya Nzambi, ne ku bwîmpè bwa Nzambi.

231 Baakàmònakàmba abu kungela lunkonko, ne: “Mukalenge Branham . . .” Mwànà mu—mukese wa mu diboko uvwa mufwe awu ukaavwa mubiishiibwe, ne ndambu wa bintu mwaba awu. Beena Katolike binunu makumi asatu . . . To, numfwile luse. Bavwa binunu makumi abidi. Binunu makumi asatu bavwa mmu Afrike. Beena Katolike binunu makumi abidi kwakidilabo Kilisto bu Musungidi wabo sungasunga, musangu umwe, paakenzeka bwalu abu, mêmè mwimane mu Mexico City. Nanku bansaserdose abu, kabayiku mwa kupeta cya dyamba to; bavwa bapite bûngì, bivwa bifwanyine kujuula cimvundu. Bavwa bapite bûngì luseke lumwe. Ke yêyè ne: “Mukalenge Branham, udi wela meeji ne bansantu beetu twêtù aba badi mwa kwenza cintu cimwecimwe cyùdi wenza eci?”

232 Bu mûmvwà mumanye dilongesha dyabo, mêmè kwamba ne: “Cya bushuwa, piikalabi ne badi ne mwoyi’s.” Nwamonu anyi? Pa nanku, kwèna mwa kwikala munsantu wa beena Katolike paudi kuyi mwanji kufwa to, nudi bamanye.

Ke yêyè ne: “Kaa, kadi kwèna mwa kwikala munsantu paudi kuyi mwanji kufwa to.”

233 Mêmè ne: “Nudi nubala ciine aci penyi? Pòlò mmwambe ne: ‘Kùdi bansantu badi mu Efeso,’ ne aba badi babiikidiibwe kudi Nzambi. ‘Kùdi bansantu badi mu Efeso,’ uvwa ubala mukanda wende mubafundila; ne bansantu badi mu myaba mikwabo, mu Galatiya, ne—ne ‘bansantu bàdi mu Loomo,’ ne bakwabo. *Bansantu*, ‘badi bajiiidiibwe.’ Bwa aci nudi nwamba bishi?”

234 Yêyè ne: “Mu bushuwa bwa bwalu, bwa mpindyewu, katwena ne cya kukokangana pa Bible to. Bwalu, twêtù tudi ekeleeziya, nenku anu cidi ekeleeziya wamba. Katwena bwalu ne cidi Bible wamba to. Anu cidi ekeleeziya mwambe.” Yêyè ne: “Kadi webe mmwenenu wêwè udi cinyi pa bidi bitangila ekeleeziya wa Katolike?”

235 Mêmè ne: “Mvwa mwa kujinga bwa ne kwikadi mungele alu lukonko to. Bu mùdi mulungeele, nanku nênkwambilè Bulelela.”

Yêyè ne: “Ee, ndi muswe ungambile Bulelela.”

Mêmè ne: “Ke mushindu mutumbuke wa ditendeleela dya bakishi dîndi mumanye.”

Yêyè ne: “Mmunyi mùdi ukafika ku dyamba aci?”

236 Mêmè ne: “Cyônso cidi cyakwilangana kudi bafwe mmutendeleedi wa bakishi.” Mêmè ne: “Munsantu awu yêyè wandamuna, mbwena kwamba ne udi mu iferno. Bwalu, aba bakaadi bamane kusambuka kajila aku, wanyi—wanyi Bible mmwambe ne kêna mwa kwalukila to.” Ncya bushuwa. Ke mêmè ne: “Byôbi nanku, byôbi ne mmunsantu, awu ndyabulu mwikale wakula byenze ne mmunsantu, kadi kayi munsantu awu to, twamb’eku twamb’eku.”

237 Ke yèyè ne: “Ee, mpindyewu, indila kakese.” Yèyè ne: “Wèwè peebe, s’utu wakwilangana kudi bafwe.”

Mèmè ne: “Penyi?”

Yèyè ne: “Yesu Kilisto s’wakafwa.”

238 Mèmè ne: “Kadi Yèyè’s wakabiika ku lufu. Yèyè kî mmufwe to. Kadi Udi ne mwoyi, bwa kwikala kwakwilangana, ke mene mutwangaji umwepele pankaci paa Nzambi ne bantu.”

239 “Ndi Ewu uwu mufwe, kadi udi cyakabidi ne mwoyi, ne udi ne mwoyi kashidi. Ndi ne nsapi ya lufu ne ya iferno.” “Ewu yònsò udi muswe, alwe kunwa cyanaana ku mâyi a Mwoyi.” Ekelekele! Ke wetu Nzambi nyawu. Ke wetu Nzambi nyawu.

240 Nenu dimiinu dya mwakane dikaadi disheepokete. Ambila bantu maalu aa. Ambila bantu bwa dyalukila ku njila wa Bible. Ambila bantu bwa bishima. Ambila bantu bwa cyôci aci. Piikala wabo “ekeleeziya kayi witabuuja Cyôci aci to,” nanku mbânà baa panshi, bwa Nzambi. Bible udi wamba ne twètù katuyi mwa kutwala dikengesha, ne mateeta, ne tuseku, ne kubiikidiibwa bu “bansantu babunguluki baa mu malaba” ne bikwabo, baa nanku awu, panwikala kuyi mwa kubitwala to, nudi bânà baa panshi, kanuyi bânà baa Nzambi to. Bible ngudi mwambe nanku awu.

241 Umbiikile “munsantu mubunguluki wa mu malaba,” paudi muswe. Umbiikile cyônsò cyûdi muswe kumbiikila aci. Padi anu mwoyi wanyi mwikale mu bulongame ne Nzambi, ne dilabula dyanyi diikale dikumbanangana ne Bible wa Nzambi, ndi ntungunuka anu ne kuya mutangile luseke lumwelumwe elu. Eyowa’s, mukalenge. Ke citudi twitabuuja ncyôci aci. Ke Ekeleeziya wa Nzambi udi ne mwoyi nyawu, udi kayi mufume ku dimanyina dya Nzambi mu tulaasa to. Kêna ufuma ku mmwenenu kampanda mukwatakaja kudi bantu, wa mamanya a mu mutu to. Kakuyi mpatà to udi ufuma ku Bulelela bubuulula bwa ne Yesu Kilisto udi Mwânà wa Nzambi.

242 Bu ne mvwa anu ne mmwenenu wa mamanya a mu mutu, bwalu ekeleeziya wa ba-Baptistes anyi ekeleeziya wa ba-Méthodistes mmundongeshe ne mbintu *kampanda*, pândi nteeleja Bible ewu, piikala Bible. . . Bu ne mvwa mubatiijibwe mu dîna dya “Taatu, Mwânà, ne Nyuma Mwîmpè,” kadi mèmè kubala Bible ewu, ne muyiishi kampanda kungambilaye ne kakwena mwaba nansha umwe ukaadibo babatiizangane mu mushindu mukwabo pa kuumusha mu Dîna dya Yesu Kilisto, ne mèmè kucibala kumona ne m’Bulelelela, mèmè’s nênkabwelè mu mâyi ne lukasa lwônsò. Eyowa’s, mukalenge.

243 Bu muntu mwa kungambila ne—ne Yesu Kilisto ke mwondopi munene, kadi ekeleeziya wanyi ungambila ne: “Matuku a bishima akaadi mamane kupita,” kadi paanyi mwikale ne dijinga dya kwondopiibwa, ndi mufwanyine kunyeema lubilu ne mwanyi mwônsò, nya ku cyoshelu, bwa mèmè kwondopiibwa. Nênye cya bushuwa.

244 Bu ne mvwa muyiishi, ne mwikale ne mu—muyiishi mukaji mu cyambilu cyanyi, kadi mbala mu Bible mmona ne mukaji kâna ne cya kuyiisha to, ndi mufwanyine kuumumushamu, nansha bya kumona lufu.

245 Nenku vulukaayi ne, mukaji mukwabo musòmbè anu paanyima mwaba udi Mwaneetu wa bakaji Wright wawa, diloolo kampanda, mukaji awu uvwa pabwîpî ne kungeela pambelu paa ciibi paapa bwalu mvwa mwenze cintu cya mushindu awu. Eyowa's, mukalenge. Mvwa mwambe ne: "Kanwena nulwa mu ekeleeziya wanyi mêmè ewu ne ntanyi yenu..." Cikondo civwabo ne ciibidilu cya kuvwala, anyi bakosa nkanzu yabo lwa kwinsi eku nunku ewu, ne cintakanyi civwa ne mmwenekelu wa lukutukutu aci, ne citupa cya mibidi yabo ciikale bwashi. Mêmè ne: "Bôbô badidinge anu bafike mu wanyi ekeleeziya, ncyà bushuwa ne nêmbêlê pambelu." Nenku kakaji kakwabo kaa kakenyakenya ku mênù lwa kwinsi eku, nkafwe kakuyi kupite matuku to paanyima paa ciine aci; ne pashiishe kadi kumbiikidishaye, mwikale ukaadi ùpunga ne lufu. Uvwa nsongakaji wa cyena Katolike, kubandaye mwaba awu e kusòmba mwikale muvwale cyôci aci mushindu awu. Mêmè kutangila paanyima mmupongwela, musòmbè lwa apa, nenku bacivwa bimba misambu. Mêmè kukopola nkooci wanyi, kuya piine paanyima apu, kumubwikila makaaya. Mêmè ne: "Inâbânâ, pawikala ujinga kunteeleja nyiisha, swaku uvwale nkooci ewu paucidi mu ekeleeziya wa Nzambi apa." Nwamonu anyi? Ncyà bushuwa.

246 Yêyè kupatuka mwaba awu wenda utwa mikuma, mutangalaje tushiku atu. Kupatukaye mu nzubu awu. Kwambaye ne: "Yêyè ne wende ntendeleelu, ncyênâku mufwanyine kwitabila wanyi ngombe bwa kwikalaye mu ntendeleelu wa mushindu awu to."

Mêmè ne: "Kabinutacishi to, kaakwikalaku nende to."

247 Pashiishe tuvwa benze ntenta, ke kumbiikidishabo pakaavwaye ùpunga ne lufu. Uvwa mupete disaama dya mwoyi, nenku ukaavwa ùpunga ne lufu. Bayende kulwaye. Ke yêyè awu: "Udi mwa, lwâ lukasa!" Mêmè paanyi munkaci mwa disangisha. Nsongalume munene, mule, mwimane ku ciibi aku, mungindile. Ke mêmè kunyeema anu bu. . .

248 Mêmè kubwela mu mashinyi aanyi kadi kupatuka e kukuya lubilu. Pâncivwâ ngenda mbanda apu, mêmè kutuutakeena ne munganga mukaji mukulumpe awu pambelu apu, wa bwena utu musòmbèle mu Howard Park awu, ucidimu. Yêyè ne: "Révérend, kabyena bikengela bwa wêwê kulwa to." Kukaadi bidimu makumi abidi, pâmwâpa bipite apu ndambu. Yêyè ne: "Mmumane kufwa." Yêyè ne: "Wâfû kwênji tusunsa bu tusatu nanku awu." Yêyè ne: "Mmwele mbila mikole ya dikema, ukukeba wêwê." Yêyè ne: "Ndi ne mukenji webe."

Mêmè ne: “Ncinyi?”

249 Yèyè ne: “Ambilaayi muyiishi awu, bwa bîmvwà mwambe abi ne: ‘Swaku umfwile luse.’”

250 Mêmè kupwekaku bwa mmumone. Mukaji mulenga kwîsù; kadi ukaavwa musaame bikole. Uvwa ne tuntobengela eku ne eku kwa dyûlù aku; mukaji mulenga kwîsù. Ne tuntobengela atu, bwa pa kumona, tuvwa twenze anu bu ne mbijuuji. Ne mèsù ende akaavwa mapatuke ônsò mu bimpòkòmpòkò emu, miikale makudimuke maye mwamwa ndambu. Mu bushuwa bwa bwalu, byamunda byende ne twonyi bivwa binyugakane ne bipatule bunyawu, ne mupuuya mubande too ne pa bulaalu pônsò apu, mushindu awu.

251 Ke bayende kuntangila, kwamba ne: “Mwaneetu Branham, enza disambila, bwalu yèyè uvwa anu ukeba kukumona wêwè.”

Mêmè kwamba ne: “Disambila bwende yèyè bwa mpindyewu kî ndifwanyine kwikalaku ne dikwacisha nansha dikese to.”

252 “Kudi mucu mwinamine, ke kwadishindilawu.” Nwamonu anyi? “Kanudingibu nansha; kabatu baseka Nzambi to. Cyônsò cidi muntu ukuna aci, ke cyapoolaye.”

253 Nudi numona mwaba ukaadidi anyi? Mpindyewu cidi cyenzeke ncinyi? Tangilaayi numone mukaji udi mufwanyine kwenza nanku. Tangilaayi bakaji bavwa ne mwoyi kale wawa, nsongakaji mujì wa maja awu, mwanende wa bakaji wakalwa nganyi apa? Mukaji wa mvwadilu mubi. Mwânà wa bakaji wa mukaji wa mvwadilu mubi awu nganyi? Nsongakaji mujì wa rock’n’roll. Wende pende mwânà wa bakaji neikale cinyi? Hum! Ncinyi aci?

Nudi numona dimiinu dya mwakane anyi?

254 Tangilaayi nwênù ba-Baptistes. Anjaayi kwalukila paanyima ndambu. Alukilaayi ku John Smith, mujuudi wa cisumbu cyenu, nwênù ba-Baptistes. Cikondo aci, uvwa usambila bwa bubi bwa bantu, too, wela mbila ne kusambila bwa bantu too ne pavwa mèsù amuula abwita, nenku bikengela mukajende abange kumudiisha byakudya ku meesa, byakudya byende bya mu dinda.

255 Ne nwênù ba-Méthodistes, mu nyungulukilu emu, ne tukanu tupayika ku dyûlu ne ku maci, numweka bu bisòmbedi bya pa tubalu bya dyabulu; nupatuka, bawwale tuputulu, ne bintu bya mushindu awu! Pavwa, mukulumpe John Smith, umwe wa ku bakulu baa ekeleeziya wa ba-Méthodistes, kumpala kwa kufwaye pakaavwaye ne bidimu makumi mwandamukulu ne bitaanu, wakayiisha kaadiyiisha kîpi kaa bidimu binaayi, anyi, mêmè anaayi. Bivwa bikengela bamwambula bamuteeka mu cyambilu. Kadi mêmè ende a ndekeelu ngôwò aa. Wakamba ne: “Ndi mulendushiibwe bikole be ku cyenzi cya ekeleeziya wa ba-Méthodistes.” Yèyè ne: “Ne bânà baa bakaji biine baa

ekeleeziya wa ba-Méthodistes bakaadi bavwala tukanu twa ngôlò ku minu.” Uvwa mufwanyine kwamba cinyi mpindyewu ewu, pakaadibo bavwala tuputulu apa, biikale bimba mu korale?

²⁵⁶ Nuvwa nunyeema bîmpè. Cyënzèkì ncinyi? Nukaadi nwenza maalu bu mamwènù. Ncyôci menemene.

²⁵⁷ Ke bwa cinyi twètù katwena twitabila nansha dimwe dya ku mangumba aa bwa kushaalawu makulame mu nyungulukilu wa eci, pa, ne dînà apa ne: “Tudi ba-Méthodistes. Tudi ba-Baptistes” to. Twètù tudi anu baa Kilisto. Cilekelaayi mushindu awu, ikalaayi badishikamine.

²⁵⁸ Mpindyewu, nudi numona dimiinu dya nyoka anyi? Ncifwanyine kwikala ne mushinga kaayi kudi mukaji wa mushindu awu? Ciine aci ncifwanyine kwenza cinyi? Cinyi? Badi anu batungunuke, benda bapweka. Mbasake ba-Baptistes paanyima, basake ba-Méthodistes paanyima, basake ba-Presbytériens paanyima. Cidibo bafwanyine kwenza ncinyi? Mbaalukile paanyima bônso, bu mamwábò, ndumba wa kale awu. Ke bôbò abu bônso, benda bundumba bumwebumwe abu. “Ee, aci kacyna ne cidici cishintulula to. Batu babñnyije mu mâyi. Batu babamyamine mâyi pa mutu. Bôbò, mbalwe, benze ditonda dyabo. Mbabakandike munda mwa ngondo isambombo; kî mbanwe maala mapitepite bûngi mu nntanta mwine awu to, ne bikwabo. Mbabweje bidimba byâbûngi be. Batu bafuta bîmpè pa . . .” Kaa, ekelekele! Aci kacynaku ne dipetangana ne mamuma a Nyuma to.

²⁵⁹ Mamuma a Nyuma adi “diitabuuja,” kwitabuuja Yesu Kilisto umweumwe awu makeelela, leelu, too ne kashidi; “dinanga” bwa bânà beetu; “disanka, ditalala, mwoyi mule, bwîmpè, musangeelu, lutuulu, bupole, didikanda.” Ke bintu mbyôbi abi, mamuma a Nyuma.

²⁶⁰ Kadi twètù tudi twangata muntu ne: “Ee, udi—udi ne nsômbelu mwîmpè ne beena mutumba.” S’ke muvwa Esawu pende.

²⁶¹ Esawu kavwa wenzelaku muntu bibi to, kadi’s Esawu uvwa wa dyabulu; kadi Yakobo, mupatuke munda mumwemumwe amu, uvwa wa Nzambi. Dimiinu dya dyabulu; Dimiinu dya mukaji, Dimiini dya Nzambi ndipicilemu.

²⁶² Mpindyewu, nudi numona, byônso mbipweke too ne ku cyôci eci, ne mbikashaadile ku cinyi pa buloba leelu ewu? Eci nêncyâmbè ne mêyi mashile ncyoncyoncyo, bwa kucipoopela menemene, pashiishe netubange ditabuluja paanyima paa cyôci eci, mu disangisha didi dilonda. Mbikafike too ne ku mmwenekelu kampanda. Nenu, bu nwènù mwa kuswa, ncyêna ngamba bwalu ebu bu dinyangakaja dya cijila to. Ncyêna ncyamba bwa kwikala ne lwonji to. Ncikafike pa mwaba wa ne, cikaadi musumba munene, wa batendeleedi balela mu masandi,

bànà baa panshi. Ke aanyi mêyi a ndekeelu ngawu. Nku cyôci aci menemene kukaadici cikafike. Nudi bamanye aci ne mbulelela. Mbikafike mu mwaba wa ne bikaadi bya didivwija beena ekeleeziya ne bidimba bya ekeleeziya: “Biikale ne cimwenekelu cya difwana dya Nzambi, babenga kwitaba Bukole bwadi,” ne mwalubi kufika ku musumba wa batendeleedi, bànà baa panshi. Ke cyôci menemene.

²⁶³ Cidi cishaale cidi cilonda ncinyi? Kudi ciidizaji cya bombe cilembeleja muulu mwamwa, byàbûngì, bombes ya cobalt ne bikwabo byônsò. Mbindile anu bwa dîbà adi difikè. Nenku nekwikale kabutu kaa ku kapyà, bu mwakenzekaku ku mâyi.

²⁶⁴ Nenku, balunda baanyi, cyônsò cinudi nwenza, pawikala mwena Kilisto ne mwikale ne Nzambi munda mwa mwoyi webe, ne mwikale mumanye ne ukaadi muumuke ku lufu muye ku Mwoyi, bivwa bikengela wêwè kwikala muntu wa disanka dipite dya baa pa buloba bujima.

²⁶⁵ Padi Nyuma Mwîmpè munda mwebe. . . Padi Bible wamba ne: “Yesu Kilisto umweumwe awu makeelela, leelu, too ne kashidi”: mangumba adi amba ne: “Kadi twêtù tudi twitabuuja ne bishima bikaadi bimane kupita”; Nyuma Mwîmpè udi wamba ne: “Amen. Yesu Kilisto udi umweumwe awu makeelela, leelu, too ne kashidi. Biikale nanku.”

²⁶⁶ Piikala Bible mwambe ne: “Nyingalalaayi, nubatiijiibwe muntu ne muntu mu Dînà dya Yesu Kilisto bwa dilekelediibwa dya mpekaatu, nenupete kupà kwa Nyuma Mwîmpè. Bwalu mulayi udi kunudi nwênù, ne bànà beenu balela, kudi baa Bisamba bya bende, bônsò badi kule, bûngì bwônsò bwabiikila Mukalenge Nzambi wetu. . .” (Bûngì bwônsò bwabiikila Mukalenge Nzambi wetu abu, nwamonu’s, kî mbûngì bwônsò bwabiikila ba-Méthodistes, ba-Baptistes abu to, kadi bûngì bwônsò bwabiikila Mukalenge Nzambi wetu abu, nebabete Nyuma Mwîmpè ewu, ne nebabatiijiibwe mu Dînà dya Yesu Kilisto, cidi Bible mwambe): padi aci cikulenga, udi wamba ne: “Amen!”

²⁶⁷ Ekeleeziya yêyè mmwambe ne: “Kaa, kabyena ne cidibi bishintulula to.”

²⁶⁸ Kadi Nyuma Mwîmpè ewu munda mwebe neatwe “amen” ku Dîyî Dyende.

²⁶⁹ “Muntu kaakwikala ne mwoyi anu ku dyâmpà nkaayaadi to, kadi ku Dîyî didi dipatuka mukana mwa Nzambi.” Ké bwalu mbwabu.

²⁷⁰ Ndi muswe bwa undeeje Mufundu umwe cyanaana udi wamba ne cimuma cya pomme ke cyakabanga budi bwenda mpindyewu ebu. Ndi muswe bwa undeeje ne cyakadyabo civwa mbimuma bya pommes. Mémè ngânùleeji mwaba uvwa Kaayina mwelele meeji ne civwa ncintu cimwecimwe aci, ne mwaba udi dimiinu dyende dicikàle dyela meeji amweamwe awu.

271 Kadi dibuulula dya mu nyuma dya Nzambi didi dijaadika, ku Bible, ne civwa ndisangila dya mulume ne mukaji, kadiyi dyanyishiibwe to. Ke kwôkô aku kwakafuma bantu beenu baa mpolondo. Ke kwakafumina mpekaatu wenu. Ke kwakafumina dinyanguka dyenu. Ke kwakafuminabi byenda bipweka.

272 Mpindyewu monaayi mu byônsò ebi—ebi, tangilaayi, nyo—nyoka uvwa ne meeji matwe misangu ibidi. Dimiinu dyende ditu anu ne meeji matwe misangu ibidi. Nenku ndi muswe kubanda mu cyambilu emu kukwata cikolokolo eci mu cyanza cyanyi, ne ngimane ne makàsà aanyi pa cyambilu, bwa ngâmbè nunku. Nenku, leelu ewu, bantu beenu banene beena mamanya a mu mutu badi penyi? Mpaasata wenu udi mupweke muye mukapete dimanya dya mu mutu bûngi cyanaana awu, mwikale ujuuka wimana; yèyè ke mpaasata wa ekeleeziya idi mitambe bunene idi mu ditunga edi, ne bikwabo mushindu awu. Mmwaba kaayi udi dimiinu dya nyoka adi disanganyiibwa? Mu myaba ya meeji matwe ne lumvu bya mushindu awu; bamanyi baa mabala baa meeji matwe, baa budimu. Ke kudiye usanganyiibwa aku. Ke kudiye mwadije nkwasà musòmbè nkwaku.

273 “Kî nku bukole, anyi ku dikanda to, kadi nku Nyuma Wanyi, mudi Mukalenge wamba.” Nwamonu anyi? Ke kunudi . . .

274 Pashiishe nwangata mwaneetu wa balume mutekete udi mwimane kwinshi eku mu disangu, wela mbila mèsù amba kujoomoka, pâmwâpa mwimane mwaba awu wimba cindaala cya kale, wamba ne: “Mwaneetu, lwâku, upete Mukalenge!”

275 Mpaasata upicilapu, wamba ne: “Huh! Ncyêna mufwanyine kwitabila dyanyi disangisha. . . Mona’s, ncyênâku mufwanyine kwitaba bwa kumwela diboko, ncyênâku mufwanyine kwitabila wanyi. . . ncyênâku mufwanyine kwanyisha bwa Liddy ne Johnny ne bakwabo bwa kummonabo mu mwaba bu wawa to.” Tungunuka nda kûyaayà, dimiimu dya dyabulu naanyi we, wèwè’s udi uya mutangile ku mwaba webe wa ndekeelu wa Cyendelele, twamb’eku twamb’eku. Ncyà bushuwa. Nunku ndi mwambe mwaku mukwabo mwaba awu, kwamba ne “bânà baa panshi,” bidi anu bu ne mwaba awu ke ukaadibi menemene. Bwalu, nudi numona, nwênù . . .

276 “Muntu nansha umwe kêna mwa kulwa kûndi Mêmè padi Taatu Wanyi kayi mumukoke to. Ne ewu yônsò udi ulwa kûndi, Mêmè, nêmmubiishè ku lufu mu dituku dya ndekeelu. Kakwena cintu nansha cimwe cyajimina to. Mêmè ndi naaci. Nêncilame. Muntu nansha umwe kêna mwa kucyenza to, pa kuumusha Eci.”

277 Byônsò mbilaale kudiYe. Kwêna mwa kwamba ne: “Mêmè ndi mwenze cintu kampanda” to. Ngàsà wa Nzambi ngudi mwenze byônsò abi. Pa nanku, kakwena cîndi mêmè mwenze to. Ncivwaku mêmè ne cintu cya dycenza to; nansha wèwè, kuvwa naaci to. Kutu mukumbanyine cintu nansha cimwe to. Nzambi ngudi mwenze kantu ne kantu. Kutuku mujuule munu webe

awu nansha bwa kandambu kaa cyôci aci to. Kwakamba ne: “Ee, ndi mupatukile mu famiye mwimpè. Mèmè ngudi mwenze *cikampanda*” to. Aci kaciyena ne dipetangana nansha dikese ne cyôci aci to. Nzambi n’Yèyè Udi mucyènzè; nduse lwa Nzambi.

278 Numfwile luse mpindyewu, katwena banji kufika pa dîbà dikumi ne dimwe jaajaaja to, kadi nkaadi pa kujikija, nansha nanku. Nwamonu anyi?

279 Mbanganyi badi bumvwa ne Bible udi wamba ne bintu ebi m’Bulelela? Nwènù beena Branham Tabernacle, nangananga. Mpindyewu, aci cidi anu cimwe pa dikumi ne bisambombo bitudi twètù tulongesha ne twitabuuja. Kadi, vulukaayi, bwenu nwènù babandidi, ndi mufwanyine kwamba nenku, nwènù badi balwa mwaba ewu kadi kanuyi bidimba to. Mushindu utudi twitabuuja cyôci eci, ne *Eci* m’Bible, ne Bible ke Bulelela bwa Nzambi.

280 Ne tudi twitabuuja, ne, mu Dipungila Dikulukulu, mpindyewu, bavwa ne mushindu wa kumanya civwa bulelela ne civwa kaciyi bulelela.

281 Mpindyewu, tudi bamanye twètù bônso ne bavwa ne mikenji mifunda. Mbanganyi badi bamanye nanku? Mikenji, mè—mèyi matuma avwa asanganyiibwa mu musheete wa cipungidi, ne bikwabo; eyo, mikenji pa mèyi matuma. Ivwa yamba ne: “Kwendi masandi. Ewu yônso wènda masandi nebamwase mabwe.” Nwamonu anyi? Adi divwa ndi—ndiyi dituma, ne mukenji pa dîyi dituma. Mpindyewu, musheete wa cipungidi uvwa musômbe mushindu *ewu*; mèyi matuma avwa munda amu, ne mikenji ya mèyi matuma ivwa mu bibombi ku luseke lwa musheete wa cipungidi. Bu muntu mwa kulwa mwaba ewu, mwende masandi; bavwa beela cyanza muntwamu bangata civwa mukenji mwambe ne, “bamwasa mabwe.” Bavwa baya nende pambelu bakamwasa mabwe. Ke civwa mukenji wamba pa dîyi dituma adi.

282 Mpindyewu bavwa kabidi ne mishindu mikwabo ibidi ya kumanya. Kutu anu isatu misangu yônso, bu cijaadiki. Bavwa kabidi ne mushindu mukwabo wa kumanya, civwa nku muprofeta anyi mwena ndoota. Mbanganyi badi bamanye aci? “Kwôkô kwikale muntu munkaci mwenu mwikale wa nyuma, anyi muprofeta, Mèmè Mukalenge nêndimanyishè Mèmè mwine kudiye mu biloota, ne nêngàkulè nende mu bikeena-kumona.” Neyà bushuwa. Mpindyewu, uvwa mmwambi wa biprofeta.

283 Mpindyewu, bu muntu mwa kulwa, wamba ne: “Kaa, Aleluuyah, ndi mupete bwalu abu! Ndi ngamba ciprofeta mpindyewu mu Dînà dya Mukalenge. Ndi mupete dibuulula.” Kabavwa balekela aci cishaala anu nanku to, munutu nwènù aba nwenza. Bavwa banji kukenketa bwalu abu ne Nzambi, dyambedi.

284 Mpindyewu, pa cibwikilu cya pa cyâdi cya Aalona pavwa civwabo babiikila ne Ulimà Tuumimà. Mbanganyi bakaadiku bumvwe awu mwaku? Civwa ncinyi? Civwa mmabwe dikumi ne abidi, asambombo luseke lwônsò, a bankambwa dikumi ne babidi; jaspe, Yuda, ne bikwabo, too anu nanku, mabwe dikumi ne abidi awu. Nenku bavwa bangata muprofeta ewu, anyi mwena ndoota ewu, nenku bavwa bakudika cibwikilu cya pa cyâdi aci kuulu, bamwimanyika mwaba awu. Nenku bamba ne: “Mpindyewu ambaaku ciprofeta ne ulonde ciprofeta cyebe.”

“Mukalenge mmwakule naanyi mungambile bintu kampanda ne—ne bintu kansanga.”

285 Nansha cimweka cilelela munyi, civwa cifwanyine kumweka bu bulelela anu bwa menemene ebu; kadi pavwa mabwe awu kâyi adisanga enza diikala dya mwanzankongolo dicyamakane muntwamu, mu Ulimà Tuumimà amu, meekala awu adisanga cintu cimwe, citambe-mfùkilu cikwata mudimu, cishindika. Nwamonu’s, Nzambi utu misangu yônsò anu ushindika Dìyì Dyende. Nwamonu anyi? Nenku makênkè a citambe-mfùkilu awu kâyi ateema mwaba awu to, nanku nansha ciikale cimweka bu cya bushuwa bishi, civwa cya mafi.

286 Mwena ndoota yêyè mwambe ne: “Ndi mulooto ciloota, ne ciloota aci cididi cyamba, ne: ‘Bidi bikengela Izaleela uumuke aye mu mwaba kampanda, bwalu beena Suuliyà nebabwelele *elw* luseke bamucimike.’” Bavwa baya ne mwena ndoota awu kuntwaku; uvwa wawula ciloota cyende aci. Pavwa makênkè awu kâyi ateema macyamakane muntwamu to, uvwa mwambe mafi, nansha muvwa. . . Piikalabi ne beena Suuliyà bakaavwa bamane kwimana mu mushindu wa mvita kwabo aku, uvwa anu mwambe mafi. To, mukalenge. Bôbò, kakuyi mpatà to, bivwa bikengela cijaadikiibwe kudi Ulimà Tuumimà.

287 Mpindyewu bantu bônsò mbamanye ne bwakwidi bwa kale bwakamana kuya, babushipe, ne Ulimà Tuumimà wakaya naabu. Tudi bamanye nanku, kî mmwômò anyi? [Disangisha didi dyamba ne: “Amen.”—Muf.]

288 Ne bwakwidi bupyabupya bwakabwela. Cinyi? Tudi leelu ewu ne Ulimà Tuumimà anyi? Eyowa’s, mukalenge. Dìyì dya Nzambi! Eyowa’s, mukalenge. Ke yêyè *Ewu*. Muntu nansha yêyè nganyi mwikale ne dibuulula nansha dya mushindu kaayi, anyi wamba cintu nansha cya bishi, anyi dilongesha kampanda kadiyi dikumbanangana ne ditang- . . . ne kadiyi ditangila Bible ewu to, mu Mifundu yônsò nkòong, awu mmwambe cya cyanaana. Nansha yêyè mwikale wa mu dingumba kaayi, nansha yêyè mwîmpè wa bishi, nansha yêyè wa meeji matwe a bishi, nansha mulonge tulaasa twa bishi; mmwambe mafi.

289 Nenku padi muntu nansha yêyè nganyi ukwambila bintu ebi, bitudi balongeshe apa mpindyewu mu ekeleeziya emu ebi, ukwambila, ne: “Bôbò bakumyamine mâyi pa mutu, bidi

anu bîmpè,” awu mmukwambile dishima. Aci kacyakuteemaku pa Ulimà Tuumimà nansha. Padiye ukwambila, wamba ne: “Dipongolwelangana dya mâyi pa mutu ndya bushuwa,” mmukwambile dishima. Ukwambila ne: “Kubatiijibwa mu dîna dya ‘Taatu, Mwânà, Nyuma Mwîmpè, nkwîmpè,” mmukwambile dishima. Yèyè mukwambile ne: “Cikondo cya bishima cikaadi cimane kupita,” mmukwambile dishima. Yèyè mukwambile ne: “Bidi anu bîmpè bwa bakaji kuyiishabo,” mmukwambile dishima. Yèyè mukwambile ne: “Bidi anu bîmpè bwa wèwè kutungunuka ne kushaala mulamate ku dingumba dyebe,” mmukwambile dishima. Aci kacyakuteema pa Ulimà Tuumimà to. Ne bintu dikumi ne bibidi misangu yàbûngì bidi bipatuke, mu “MAAMU NDUMBA” wa kale awu, biikale bisambulujja muntwamu, nenku mwaba awu ke bwa cinyi twètù tudi baditole bashiyangane ne dingumba.

²⁹⁰ Tudi banange bânà beetu baa balume ne baa bakaji badi mu miine mangumba awu. Kadi kî nkuya, wenda wamba ne: “Mémè ndi Méthodiste,” nenku udivwija mwena Kilisto to, bwanyi mémè. Udi mwena Kilisto bwalu udi mulediibwe ku Nyuma wa Nzambi. Kabyena bikengela wèwè kwikala Méthodiste anyi Baptiste to. Kabyena bikengela wèwè kwikala nî ngewu nî ngewu to. Bidi bikengela anu ulediibwe ku Nyuma wa Nzambi. Nudi nwitabuuja aci anyi? [Disangisha didi dyamba ne: “Amen.”—Muf.]

²⁹¹ Pa bishimikidi ebi, muntu yèyè mwaba ewu ujinga kutwela diboko ne kubwela mu bwobumwe bwa dikuukwila edi, ne muswe—muswe kwinyijiibwa, kubatiijibwa mu Dîna dya Yesu Kilisto, ciinà cya mâyi neyeci. Nebiikale mwa kubatiizangana, mu katanci kakese emu.

²⁹² Kwôkò kwikale muntu, bantu bààbûngì mwaba ewu, muntu mmuswe kulwa, mu mushindu kaayi wônsò anyi? Ke twètù aba mwaba ewu. Ncya bushuwa.

²⁹³ Mpindyewu, twètù—twètù katwena ne bya kwikala cidimba to abi; wèwè udi ulwa anu apa cyanaana mu ekeleeziya ewu. Tudi twitabuuja ne Kilisto udi mu ekeleeziya wa ba-Méthodistes, mu ekeleeziya wa ba-Baptistes, mu ekeleeziya wa ba-Presbytériens. Yèyè udi ne bidimba mu yônsò wa ku yôyi ayi. Nenku cidi cipangike, leelu ewu; ciprofeta cya mashimi nciidi cipatula bintu abi, dilongesha dya ekeleeziya ayi, didi kakuyi mpatà to diikale dibengangana ne Bible.

²⁹⁴ Mpindyewu, muntu yèyè mundeeye Cyôci aci bitooke tòò, ncya bushuwa ne mémè ndi mufwanyine kudyenzeja...ndi ngitabuuja ne mudi Nyuma wa Nzambi bûngì bukumbane munda mwanyi, bwa kukenketa mu Bible awu ne kulwa kucilongolola. Bu mémè mwa kujuuka anu kuulu cyanaana kadi kulabula muyiishi ku cyanza, ne kufundisha dîna dyanyi mu mukanda, kadi mutungunuke anu ne kwikala ne lukinu

ne budimu mu mwoyi wanyi, ne mutungunuke anu ne kwikala ne lukuka ne dikokangana, ne mutungunuke anu ne kubenga kwitabuuja Yesu Kilisto bu Mwondopi munene, ne bikwabo bya mushindu awu, ndi mufwanyine kuya kadilongolola kumpala kwa Nzambi, ne lukasa lwònsò. Ndi ngitabuuja cya bushuwa ne ke cindi mufwanyine kwenza. Ndi—ndi mufwanyine kwikala ne meeji matooke a nanku awu pa bwalu abu. Ndi mufwanyine kuya kadilongolola kumpala kwa Nzambi. Mémè mushaale anu kacya ngaakulamaku ne bwalu nyawu ndi Baptiste anyi Méthodiste, ndi mufwanyine kupweka kuya bwa kapeta bwena Kilisto mu mwoyi wanyi. Ke cindi mufwanyine kwenza. Eyowa's, mukalenge.

²⁹⁵ Mpindyewu nwavulukaayi ditabuluja didi dilonda, diikala mwa kubanga, bu Mukalenge mwa kwanyisha, mu diloolo dya diisátù dilwalwa edi. Nediikale pa biine bishimikidi ebi.

²⁹⁶ Teelejaayi, balunda baanyi, kudi Nzambi mulelela ne udi ne mwoyi. Ncya bushuwa. Yesu Kilisto ke Mwânà wa Nzambi. Nyuma Mwímpè udi mu Ekeleeziya leelu ewu.

²⁹⁷ Mpindyewu, bu mémè anu ne muntu wa kungambila ciine aci, ndi mufwanyine kwikala ne bukenji bwa kucyela mpatà. Kadi, teelejaayi. Dìngà dituku kuntu kwaka, pàncìwà mwânà mutekete, mvwa mwimane mwinshi mwa mucu kampanda; mémè kuMumona. Mémè kuMuumvwa. KungambilaYe, ne: “Wikale kule ne bakaji baa nsòmbelu mukooyike abu. Wikale kule ne mfwanka. Wikale kule ne dyela dya milawu, ne dinwa dya maala, ne bintu byònsò ebi. Ndi ne mudimu wa wèwè kwenza pawakola.” Ndi mumanye ne Yèyè n'Nzambi wa bushuwa, udi ne mwoyi ne mwikale utabaleela ne Dìyi Dyende.

²⁹⁸ Pàngààkakolà ndambu, mushindu uvwaYe upetangana naanyi mwine, mushindu mwine uvwaYe wakula naanyi! Mushindu mwine ùngààkaMumònà kuntu kwaka, bu cipuka cilakuka kapyà, ne Kapyà aku kiikale kanyunguluka kwine aku! Mushindu mwine ùnkaadi muMumone wakula ne wamba anu menemene maalu avwa mwa kwenzeka; kabidi, misangu yònsò, byenzeka anu mu byòbì menemene, anu menemene mushindu awu.

²⁹⁹ Yèyè umweumwe Awu utu wamba maalu anu mu ôwò mushindu awu awu, n'Yèyè umweumwe Awu udi unsonola bwa kulongesha Bible ewu menemene anu mushindu ùndi mMulongesha ewu. Ncya bushuwa. Pa nanku, Cidi cifuma kudi Nzambi. Bwanyi mémè, n'Nzambi wa Bukole bwònsò, ne Yèyè udi umweumwe awu makeelela, leelu, too ne kashidi.

³⁰⁰ Yesu wakamba ne: “Ndi mufume kudi Taatu, ne ndi nya kudi Taatu.” PaakalwaYe. . .

³⁰¹ PavwaYe Nzambi mu cipeela, Uvwa Bukènkè buvwa buteema kapyà. Mbanganyi badi bamanye nanku? [Disangisha

didi dyamba ne: “Amen.”—Muf.] Uvwa Bukênkè buvwa buteema kapyá, Dikunji dya Kapyá.

³⁰² Nénku kulwaYe pa buloba apa, kwambaYe ne: “Ndi mufume kudi Taatu, ne ndi nya. . . Ndi mufume kudi Nzambi, ne ndi mpingana kudi Nzambi.”

³⁰³ PaakafwaYe, kujikiibwa, kubiika ku lufu, ne Pòlò mu njila wa ku Damaseke kutuutakeenaye Nende cyakabidi, Yèyè uvwa cinyi? [Muntu udi wamba ne: “Dikunji dya Kapyá.”—Muf.] Ucidi anu Dikunji dya Kapyá. Eyowa’s, mukalenge.

³⁰⁴ CyakenzaYe ncinyi pavwaYe pa buloba apa? CyakenzaYe ncinyi paakatuutakeenaYe ne Pòlò? Wakamutuma bishi? Yèyè wakamutuma kudi muprofeta wákamwambila mushindu wa kubatijiibwaye, wákamwambila cya dyanza; kumutentekelaye byanza ne kumwondopaye, kumwambilaye muvwaye mumone cikeena-kumona.

³⁰⁵ Yesu umweumwe awu udi mwaba ewu leelu ewu, wenza bintu bimwebimwe abi, mucikàle anu Dikunji dya Kapyá dimwedimwe adi, ulongesha cintu cimwecimwe aci, mwikale ucishindika ku Dîyì Dyende, ne ku bimanyinu ne maalu a kukema. Mémè ndi ne disanka dinene dya kwikala mwena Kilisto, mu mushindu wa ne ndi mupange ne cya dyanza. Ndi ne disanka dya bu mùdi wèwè mwena Kilisto.

³⁰⁶ Nénku nwènù, tabernacle ewu, nkaavwa munwámBILE ne netushintulule dîná dya cyôci eci. Kî mbîmpè bwa kwikalaci Branham Tabernacle to. Awu udi anu muntu, nwamónu’s. Netushintulule dîná dyende, bwa kumwinyika dîná kampanda dya cyanaana. Netufike ku cyôci aci, paanyima paa cikondo. Mémè ndi muswe ciikale anu ekeleziya wa—wa Nzambi udi ne mwoyi. Ncyena muswe kwikalaye Méthodiste, Baptiste, Presbytérien, wa Mpenta nansha. Ndi. . .

³⁰⁷ Bantu bônso abu, ndi mubanange ne mwoyi wanyi wônso. Ncyèna mumanye ne ngewu anyi ngewu to. Ncyèna mwa kunwambila to. Bikengela mémè nyiishe anu Dîyì. Ndi ngela bukondo mbukoka ku mukuna. Mudi ndimba, mwikale kabidi ntàndà ya mu màyì, mwikale kabidi nyoka, mwikale mishipa, kabidi. Bwalu mbwa Nzambi bwa kwangata dipangadika adi. Mémè cîndì mumanye nkukoka bukondo cyanaana, kuyiisha anu Dîyì cyanaana ne kubukoka ku mukuna, ngamba ne: “Ke bôbò aba, Mukalenge, banyungulukile cyoshelu. Wèwè ngudi mumanye badi Beebe Wèwè; Wèwè udi mubamanye kubangila ku cifúkidi. Mémè ncyèna mumanye ne ngewu anyi ngewu to. Wèwè ngudi mumanye, nanku bwalu budi kùdi Wèwè, Mukalenge. Ke cidi citambe bwîmpè cîndì mémè mwa kwenza. Nênye kuntweku nkalobe ne bukondo bwa cyâtà mwaba wa cyanaana mpindyewu, bwa nkabweje musumba mukwabo. Ke cyônso cîndì mwa kwenza.” Eyo.

Kaa, ndi ngumvwa anu bu ne ndi ntungunuka
ne lwendu,
Ndi ngumvwa anu bu ne ndi ntungunuka ne
lwendu;
Nzubu wanyi wa mu Dyulu udi ubalakana ne
mwîmpè,
Nenku ndi ngumvwa anu bu ne ndi
ntungunuka ne lwendu.

³⁰⁸ Mpindyewu vulukaayi ne, muntu yônsò udi ujinga bwa twètù kwangata nende cipungidi, abiikile anu Mukalenge Mercier mwaba ewu: BUtler 2-1519. [Nomba wa telefone ewu bakaadi bamushintulule.—Muf.] Netwikale ne disanka dya kukumona. Bananga beebe mwa kulwa, biikale bikengela bwa kulwijakajabo mu cikondo cya ditabuluja aci. . . Mpindyewu ndi nya, kuumukila diloolo edi, bwa kwikala mwaba wa nkaayaanyi, ne kwikala nciyipu munda mwa matuku abidi mpindyewu, paa nkaayaanyi.

³⁰⁹ Ndi nkabwela anu muntwamu ndifila ku dilonga, nunku ewu ne: “Mukalenge, Wêwè udi pabwîpi naanyi. Ndi mumanye ne Wêwè udi mwaba ewu. Ne Dìyì Dyebe ndyambe ne Wêwè neusemene pabwîpi ne aba badi baseemena pabwîpi Neebe.” Ndi ntungunuka ne kusambila ne kutangila too ne pândì mmona Dikunji dya Kapyra adi dibanga kutwa eku ne eku. Ndi mmanya pa dîbà adi ne cintu cidì pabwîpi. Pa dîbà adi ndi mbwela nya pa cibumba cya cyambilu bwa mudimu wa dyondopa, bwa kusambila, ne kwenza mwanyi mwônsò bwa kukwacisha babeedi ne badi mu ntatu.

³¹⁰ Tudi twanyisha musangeelu wenu wônsò awu mpindyewu. Nenku panwalwa, nulwayi biikale nwitabuuja, bwalu tudi bindile bwa kupeta disangisha dinene. Ndi njinga kwamba ne. . .

³¹¹ Mwaneetu Jeffries, udi mwaba ewu diloolo edi anyi? Tudi baswe kwanyisha Mwaneetu Jeffries ne mudimu wende. Ngela meeji ne yêyè ukaadi mumane kwalukila muye ku bisanga, ne bikwabo.

³¹² Ndi ne disanka dya kumona Mwaneetu wa balume ne Mwaneetu wa bakaji Wright, ne bààbûngì beenu mwaba ewu.

³¹³ Kabidi ngãmònu ndumbùlùlà Robertson mwaba ewu, katanci aka, mwikale ubwela kukaadi katanci. Mvwa njinga kumwela kaalumbandi bwa—bwa mukenji wende uvwaye mufile dituku adi. Muntu nansha umwe kavwa mwambe ne uvwa nganyi to. Civwa cintu cya bundu. Uvwa mufile mukenji mwîmpè mutambe pa ciprofeta, cintu cyenze bu cîndì mfuma ku diyiiisha diloolo edi eci.

³¹⁴ Nenku, pa nanku, pashiishe kuvwa muyiishi mukwabo apa mu dinda emu, anyi makeelela diloolo, Mwaneetu Smith, wa mu ekeleeziya wa ba-Méthodistes. . . anyi wa mu Église de

Dieu, lwa mwaba ewu. Ncyêna mumanye ne udipu diloolo edi, anyi to. Bu wêwè mwa kwimanyina lwa mu cyambilu emu ne kutangila paanyima paapa luseke lwalwa, mbyenze bikole ne mwa kubyamba; mbyenze anu cyâtà kacya byaya's, nudi numona, nenku kamwena mushindu wa kubyamba to. Pawikala mwaba ewu, Mwaneetu Smith, tudi tukwanyisha.

315 Ne ewu, udi musòmbe apa ewu, kî mmwaneetu wa balume mutekete wa ku Géorgie, lwa paanyima apa musòmbe ku luseke lwa Mwaneetu Collins? [Mwaneetu Neville udi wamba ne: "Eyo."—Muf.] Ndi ne disanka dya kukumona cyakabidi diloolo edi, mwaneetu.

316 Ne bakwabo beenu, nwênù bônso, muntu yônso mmumanye ne nudi banganyi.

317 Ngela meeji ne aba mmwaneetu wa bakaji ne mwaneetu wa balume bavwa baye kasambidila mwânà wa bakaji awu musangu awu, lwa mwaba ewu mene, ngangabuka udi musòmbe apa ku luseke eku ewu. Mukalenge akubeneshe, ngangabuka.

318 Mpindyewu, swayi kanwikadi nwadyumvwa bu mêmè munutape ku mwoyi to, nwênù bambi ne bânà beetu, bwa mushindu ûndi ntuuta musonso pa bwalu ebu mbukolesha ne mwanyi mwônso. Ewu n'tabernacle wetu. Cyôci aci ncutidi twimanyina, ne tudi baswe kuCiteeka anu pa Diyî adi, ne kubanyukulula naaDi. Nenku, byôbi mwa kwenzeka ne upatuke mu njila, netwalukile e kwamba ne: "Uvwa mumanye cidî cîmpè. S'nCyôci eci pa mukaba wa mêyi." Nwamonu anyi? Ke bwalu mbwabu. "S'ke Cyôci eci pa mukaba wa mêyi apa."

319 Tucidi ne byâbûngî be bivwa bikengela kusakidila mwaba awu, Leo. Kadi, kadi tudi . . . Wâmanyi kupeta bûngî abu. Shaala anu ne Cyôci aci, nenku netupete bidi bishaale bya Cyôci aci paapita cikondo. Byenze bu muntu awu, uvwa udaya midyangu, wamba ne: "Ivwa milenga be, kadi kucidi mikwabo." Nenku tucidi kabidi ne byâbûngî bya Cyôci aci, kabidi, bicikâle bilwa.

320 Mukalenge anubeneshe, mbîmpè be mpindyewu. Patucidi tu- . . . Netwênzè mudimu wa dibatiiza mpindyewu ewu. Mmwômò anyi, Mwaneetu Neville? [Mwaneetu Neville udi wamba ne: "Eyo, ke mûndî ngitabuuja."—Muf.] Kudi muntu mwaba ewu udi ukengela kubatiiza mpindyewu ewu anyi? Nansha wêwè mwikale nganyi; tudi—tudi apa bwa kubatiiza. Elaayi byanza muulu, aba bavwa bakengela kubatiiza. Muntu mukwabo, ngela meeji uvwa . . . Inâbânzâ ewu nyewu udi apa. Kuvwa muntu mukwabo anyi? Mpindyewu, tudi ne bilâmbâ mwaba ewu bwa balume ne bakaji bônso.

321 Mpindyewu, katwena twamba ne: "Umuka mu ekeleeziya wa ba-Baptistes. Umuka mu ekeleeziya wa ba-Méthodistes" to. Katwena twamba aci to. Alukila wêwè anu ku ekeleeziya webe. Kadi pawikala kuyi mubatiijibwe bilondeshile Mufundu to, mu Dinâ dya Mukalenge Yesu . . . Kî mmu Dinâ dya "Yesu" nkaayadi

to, mpindyewu. Mu Dîna dya “Mukalenge Yesu Kilisto,” ke Mufundu ngawu. Mbakubatiize bibi.

³²² Ncyêna muswe lutatu pângââfikâ ku musulu to. Ndi muswe maalu ônsò ikale matooke mu dyanyi dimanya dyônsò, pândi mukwate ticket awu ku byanza apa, nwamonu’s, bwalu ndi muswe mbwele mu mazuwa pa diine dîbâ adi. Ndi muswe kukubela bwa kwenza bya mwomumwe.

³²³ Walukile ku ekeleeziya webe. Abu bwalu, mpankaci peebe wêwê ne Nzambi. Ke cyônsò cindi mwa kukwambila aci.

³²⁴ Kadi muntu nansha umwe mu Mifundu katuku mwanji kubatijiibwa mu mushindu mukwabo pa kuumusha mu Dîna dya “Mukalenge Yesu Kilisto” to. Nenuku aba bâkaavwâ babâtijijibwe, baakabatumina dîyî kudi Pòlò Munsantu, wâkamba ne: “Mwanjelo muyiishe cintu cikwabo, ediibwe mulawu.” Yêyê kubatumina dîyî bwa kulwabo kubatijiibwa, cyakabidi, mu Dîna dya “Mukalenge Yesu Kilisto.” Ncyâ bushuwa. Ne wakacyenza. Ne cyakenzaye aci, wakatutumina dîyî bwa kucyenza; ke citwenza, bu Nzambi mwa kwanyisha.

Tudi twitabuuja mu dyoweshangana dya mâyî ku makàsà. Tudi twitabuuja meesa a Mukalenge.

³²⁵ Tudi twitabuuja mu Dilwa dya cyakabidi dya Kilisto, dya dimweneka ne mèsù, mubidi wa musunya wa Mukalenge; kacyi Nyuma to, kadi mubidi wa musunya wa Mukalenge Yesu mwikale ulwa cyakabidi mu butumbi.

³²⁶ Tudi twitabuuja mu dibiika dya bafwe dya mubidi, bwa kupeta mubidi, kawuyi wa mukulakaji mwikale ne minyengu bu mutudi tubwela mu lukita to; kadi mupyamupya, mu disanka dya menemene dya bunsonga, bwa kwikala ne mwoyi kashidi.

³²⁷ Tudi twitabuuja mu dibenga kufwa dya musuuka, kakuyi mpatâ to. Tudi twitabuuja ne kudi mushindu anu umwepele wa Mwoyi wa Cyendeleele, ke Mwoyi ûdi upeta kudi Kilisto Yesu. Ncyâ bushuwa menemene.

³²⁸ Ke bwa cinyi, katwena twitabuuja mu dinyookiibwa dya Cyendeleele to. Tudi twitabuuja mu kadilu kaa iferno, kiikale koosha ne soufre, kadi katwena twitabuuja ne kadi koosha kashidi to; kôkò koosha kashidi, udi ne Mwoyi wa Cyendeleele. Kudi Mwoyi wa Cyendeleele anu umwepele; ng’Ewu udi ufuma kudi Nzambi. Ne aci ke cya bushuwa. Newoshiibwe, pâmwâpa munda mwa mùliyô wa bidimu, mìliyô dikumi ya bidimu, ncyêna mumanye to, kadi kwêna mwa kwikala ne Mwoyi wa Cyendeleele to. Kwêna mwa kwoshika kashidi. . . Udi mwa kwoshika kashidi, kadi kî n’Cyendeleele to. Nudi numona’s, kudi dishiilangana pankaci paa Cyendeleele ne kashidi. *Kashidi* nkashidi ne kashidi, mutwangaji, biswa kwamba ne “cipoolo cya dîbâ.” Kadi, Cyendeleele, kwêna ne dinyooka dya Cyendeleele to.

329 Udi ne Mwoyi wa Cyendeleele, bwalu kudi mushindu anu umwepele wa Mwoyi wa Cyendeleele. Ne ewu udi ne Mwoyi wa Cyendeleele, udi ushaala ne mwoyi ne mmubeneshiibwe kudi Nzambi kashidi.

330 “Kadi musuuka udi wenza mpekaatu, musuuka awu wôwò newu- . . .” Newënzè cinyi? [Disangisha didi dyamba ne: “. . . newufwe.”—Muf.] Ncya bushuwa. Nanku, kawena ne Mwoyi wa Cyendeleele to. Cya bushuwa. Udi ne—udi ne dinyooka dya kashidi, kadi kî m’Mwoyi wa Cyendeleele to.

331 Nenku, nudi numona, kucidi bintu byàbûngì bidi bikengela kulongesha, netukufike matuku kumpala. Mukalenge anubeneshe.

332 Mpindyewu twîmbààyi musambu mwîmpè wa kale ewu, pacidi mwaneetu wa bakaji ubwela mwamwa naka apa. Ngela meeji inàbànzà ewu mwaba ewu udi mwa . . .

333 Rosella, ke mamwèbè? [Mwaneetu wa bakaji Rosella udi wamba ne: “Eyo.”—Muf.] Mona’s, mwoyi webe ubeneshiibwe! Ndi ne disanka dya kukumona, mwaneetu wa bakaji, wenza nanku awu. Mbîmpè be.

334 Rosella Griffin, umwe wa ku balunda batekete baa pa mwoyi batudi bapete. Nyinàbànzà mutekete uvwa kanwayi wa maala a kapyà; bwa bamwe baa kunudi nwênù mwaba ewu, mmufwanyine kwikala mwenyi. Bwa Rosella yèyè kabyena bimutonda bwa pândi ngamba cyôci aci to. Paakabandaye pa cibumba cya cyambilu kwaka kù—kùvwà. . . muneemu mu Indiana. Ne nukaadiku bamone mukengeledi wa luse, yèyè kadi ke uvwa umwe wa ku bôbò, kanwayi wa maala a kapyà wa mèsù makonyangale. Kwine aku, nkuvwa bangangabuka banaayi baa mu Chicago bambe ne yèyè udi. . . Ba-Alcooliques Anonymes, ne bakwabo bônso, bamane kumulekela. Kadi diloolo kampanda dyakabwelaye mu disangisha, Nyuma Mwîmpè kadi kukutulula nsòmbelu wende ne kumwambilaye anu mwaba awu. Aci kukosa bwalu.

335 Mutangilaayi mpindyewu, ngela meeji, ne bidimu makumi asatu ne bya mu njila, umweka bu udi ne bidimu dikumi ne mwandamukulu; mulengele, inàbànzà mutekete mwîmpè kwisù. Katu mulabuleku whisky to kubangila anu piine apu; kacyi kabidi ne dijinga dya kumunwa to. Ukaadi ne mwoyi bwa Kilisto, wenda utambakana mu misèsù, myaba yônso, wenda ufila bujaadiki bwa butumbi bwa Nzambi, ufila kudi bangenzàmpèkààtù ne baakanwayi baa maala a kapyà, eku ne eku kwa myaba ya balalakanyi yônso, ne bikwabo byônso, eku ne eku kwa Chicago, wenda wenza cintu kampanda bwa Mukalenge.

336 Wakabatijjiibwa mu Dinà dya Mukalenge Yesu, kadi mamwëndè nyewu ulwa diloolo edi bwa kwenzaye bya mwomumwe; piikala Nzambi mufike ku dimwondopa, piikala

Yesu mufike ku dimwondopa. . . “Cyònsò cinùkènì mu mēyì anyi mu cyenzedi, nwènzè byònsò mu Dìna dya. . .” [Disangisha didi dyamba ne: “Yesu Kilisto.”—Muf.] Aci ke cidi Bible mwambe. Ncya bushuwa.

³³⁷ Eyo, mpindyewu nudi baswe kwenza mudimu wa dibatiiza. Tudi baswe kujima myèndù bwa tusunsa tukese cyanaana patudi tudilongolola bwa mudimu ewu apa, bwa kubatijiibwa, ne—ne pashiishe tudi tutekemena cikondo cya dicyonkomoka mu Mukalenge.

³³⁸ Wèwè ke wènzà mudimu wa dibatiiza diloolo edi anyi? Bîmpè, mbîmpè—mbîmpè udilongolole. Nenku mèmè nêmbangè, mèmè nêndombolè misambu ne bikwabo patudi tutungunuka apa. Padibo benza. . . [Mwaneetu Neville udi wamba ne: “Kudiku bilàmbà lwa paanyima apa anyi, Doc?”—Muf.] Bilàmbà bya dibatiiza, Doc, lukasa lukasa. Eyo.

³³⁹ Twîmbààyi umwe wa ku mîmpè ya kale eyi. . . [Mwaneetu Branham udi ulombola misambu ya mu disangisha, padi Mwaneetu Neville ubatiiza mwaneetu wa bakaji—Muf.]

³⁴⁰ [Katupa kaa mukaba wa mēyì munda mutupu—Muf.] Nenku too ne patwenza nanku awu, patudi tupatuka apa, tudi ne cya kwenza cinyi?

Angata Dìna dya Yesu wèndè naadi,
Tuona mikookwela ku makàsà Ende,
Mfumu wa bamfumu mu Dyulu, netuMwase
cifulu cya butumbi,
Paajika lwendu lwetu.

Eyo, tujuukilaayi kuulu!

Angata Dìna dya Yesu wèndè naadi,
Wèwè mwànà wa kanyinganyinga ne dikenga;
Nedikupe disanka ne busambi. . .

³⁴¹ Nènnwāmbilè citwenza. Kudimuka ulabule muntu kampana mwaba awu ku cyanza, wamba ne: “Wetwawu, mwaneetu! Ncya bushuwa ne ndi ne disanka dya kwikala neebe mu disangisha emu.”

Dìna dya mushinga, Eyi dya bupole be!
. . . ne disanka dya Dyulu;
Dìna dya mushinga, Dìna dya mushinga,
Eyi. . .



DIMIINU DYÀ NYÓKA LUA58-0928E

(The Serpent's Seed)

Diyiisha edi dya Mwaneetu William Marrion Branham dyakayiishiibwa musangu wa kumpala mu Anglais mu dyalumingu diloolo, dya 28 ngondo wa citeema, 1958, mu Branham Tabernacle mu Jeffersonville, Indiana, U.S.A., ndyumusha pa mukaba wa mēyì ne dittuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org